

四庫全書

經部

# 欽定四庫全書

經部

欽定春秋傳說彙纂卷三十一

詳校官監察御史臣陳化龍

給事中臣溫常綬覆勘

總校官進士臣繆琪

校對官中書臣王鍾泰

謄錄舉人臣閔學朱

欽定四庫全書

欽定春秋傳說彙纂卷三十

兩景王七年 晉平二十三年齊景十三年衛襄九年蔡  
寅十年 靈八年鄭簡三十一年曹武二十年陳哀

三十四年杞平公鄭釐元年宋平四十  
一年秦哀二年楚靈六年吳夷末九年

春王正月暨齊平

左傳

七年春王正月暨齊平齊求之也癸巳齊侯次  
於甌燕人行成曰敝邑知罪敢不聽命先君之

敝器請以謝罪公孫皙曰受服而退俟釁而動可也

二月戊午盟於濡上燕人歸燕姬賂以瑤璫玉櫝瑯

耳不克

而還

號杜注燕竟當在今直隸河間府滄州境 濡上

杜注濡水出高陽縣東北至河間鄭縣入易水宋

分高陽地置順安軍金為安州元以後因之濡上

當在今直隸安州任丘之間鄭縣在今任丘縣境

穀梁

平者成也暨猶暨暨也暨者

胡傳

我所欲曰及不得已曰暨當是時昭公結婚彊

魯而

許之平也故曰暨至定公八年魯再侵齊結大

國之怨見復必矣其與齊平非不得已乃魯求於齊

而欲其平

也故曰及

集說

陸氏淳曰淳聞於師曰爾雅云暨及也又曰暨

不及也今據實言之乃是齊及魯平非魯欲之

不可言會齊平又不可言齊及我平故書曰暨以明

外及內且非魯志也 劉氏敞曰左氏云齊求之也

杜云齊伐燕燕人賂之反從求平也予謂杜氏之說與傳意錯傳所云齊求之者似指齊求與魯為平也其下乃云癸巳齊侯次於號燕人行成若齊已暨燕平無緣更進次號而燕乃行成也且齊侯伐燕燕人賂之則傳當云燕求之經當書暨燕平不當反云齊求之暨齊平也自昭公即位以來未嘗與齊通好此年三月叔孫婼如齊泣盟此則魯與齊平之驗矣亦猶定十一年冬及鄭平叔還如鄭泣盟章灼不疑高氏閔曰齊魯世為婚姻至襄公時齊靈數侵伐魯自是盟好中絕及景公一使慶封來聘魯方附楚而齊亦方與楚睦是以與之平齊欲平而我與之辭也黃氏仲炎曰平以釋怨復於善也春秋書平則皆非善者也鄭人來輸平結魯以讎宋也公及齊侯平莒及鄭假義以為利也暨齊平三家所欲也及齊平及鄭平結叛晉也故曰皆非善者也家氏鉉翁曰左傳謂燕暨齊平穀梁以為魯暨齊平當從穀梁

李氏廉曰禮記曰戎容暨暨果毅貌也襄公之世齊數伐魯景公初立使慶封來聘而不書魯報則魯蓋無汲汲於齊可知矣又曰案左氏注暨齊平者齊求燕而與之平間無異事故不重言燕蓋杜氏從許惠卿之說也但推之經例則暨齊平之文正與及齊平及鄭平句法相似而下文又有叔孫涖盟正與叔還涖盟之事相類且左氏下文文明說燕人行成而上文又以為齊求之文法自相背故服虔亦疑之今若截齊求之也四字正解齊魯之平而以癸巳以下方終齊燕之事則兩得之矣蓋左氏本無誤而許惠卿之誤也

附錄左傳楚子之為令尹也為王旌以田芋尹無宇斷之曰一國兩君其誰堪之及即位為章華之宮納亡人以實之無宇之聞入馬無宇執之有司弗與曰執人於王宮其罪大矣執而謁諸王王將

飲酒無宇辭曰天子經略諸侯正封古之制也封略之內何非君土食土之毛誰非君臣故詩曰普天之下莫非王土率土之濱莫非王臣天有十日人有十等下所以事上上所以共神也故王臣公臣大夫大夫臣士士臣阜阜臣興興臣隸隸臣僚僚臣僕僕臣臺馬有圉牛有牧以待百事今有司曰女胡執人於王宮將馬執之周文王之法曰有亡荒閱所以得天下也吾先君文王作僕區之法曰盜所隱器與盜同罪所以封汝也若從有司是無所執逃臣也逃而舍之是無陪臺也王事無乃闕乎昔武王數紂之罪以告諸侯曰紂為天下逋逃主萃淵藪故夫致死焉君王始求諸侯而則紂無乃不可乎若以二文之法取之盜有所在矣王曰取而臣以徃盜有寵未可得也遂赦之

章華杜注南郡華容縣今湖廣荊州府監利縣東五里有華容城

# 三月公如楚

左傳

楚子成章華之臺願與諸侯落之大宰遽啟彊

曰臣能得魯侯遽啟彊來召公辭曰昔先君成  
公命我先大夫嬰齊曰吾不忘先君之好將使衡父  
照臨楚國鎮撫其社稷以輯寧爾民嬰齊受命於蜀  
奉承以來弗敢失墮而致諸宗桃曰我先君共王引  
領北望日月以冀傳序相授於今四王矣嘉惠未至  
惟襄公之辱臨我喪孤與其二三臣悼心失圖社稷  
之不皇况能懷思君德今君若步玉趾辱見寡君寵  
靈楚國以信蜀之役致君之嘉惠是寡君既受貺矣  
何蜀之敢望其先君鬼神實嘉賴之豈惟寡君君若  
不來使臣請問行期寡君將承質幣而見於蜀以請  
先君之貺公將往夢襄公祖梓慎曰君不果行襄公  
之適楚也夢周公祖而行今襄公實祖君其不行子  
服惠伯曰行先君未嘗適楚故周公祖以道之襄公



適楚矣而祖以道君不行何之三月公如楚鄭伯勞於師之梁孟僖子為介不能相儀及楚不能答郊勞

章華之臺杜注臺在華容城內今監利縣北六十里有章華臺

集說 高氏閌曰楚靈非彊君也數會諸侯皆微國又且多叛而吳人之闕未艾也亦奚庸必朝哉蓋

晉平不能修文公之業使我不能自安而玉帛駟馳歲不遑暇以是知王室不綱而霸主猶有功於諸夏

也 趙氏鵬飛曰魯交事晉楚前年公如晉則今不得不如楚耳 鄭氏玉曰襄公適楚慕其宮室作楚

宮遂以薨焉今楚作章華之臺昭公又往落之樂而欲效其父乎以朝聘往猶曰辱也況以臺榭之樂而往

乎不待貶而見矣 汪氏克寬曰昭公屢朝於晉不納又迫於彊令而朝楚其卑辱亦甚矣

叔孫舍如齊涖盟

舍左穀作媯後同

穀梁

泄位也內之前定之辭謂之

集說

杜氏預曰公將遠適楚故叔孫如齊尋舊好許氏翰曰始暨齊平故盟以結好

# 夏四月甲辰朔日有食之

左傳

夏四月甲辰朔日有食之晉侯問於士文伯曰

故對曰去衛地如魯地於是有災魯實受之其大咎

其衛君乎魯將上卿公曰詩所謂彼日而食于何不

取謫於日月之災故政不可不慎也國無政不用善則自

附錄左傳

晉人來治杞田季孫將以成與之謝息為孟孫守不可曰人有言曰雖有挈餅之知

守不假器禮也夫子從君而守臣喪邑雖吾子亦有猜焉季孫曰君之在楚於晉罪也又不聽晉魯罪重矣晉師必至吾無以待之不如與之間晉而取諸杞吾與子桃成反誰敢有之是得二成也魯無憂而孟孫益邑子何病焉辭以無山與之萊柞乃遷於挑晉人為杞取成楚子享公於新臺使長鬣者相好以大屈既而悔之遂啟疆聞之見公公語之拜賀公曰何賀對曰齊與晉越欲此久矣寡君無適與也而傳諸君君其備禦三鄰慎守寶矣敢不賀乎公懼乃反之鄭子產聘於晉晉侯有疾韓宣子逆客私焉曰寡君寢疾於今三月矣竝走羣望有加而無瘳今夢黃熊入於寢門其何厲鬼也對曰以君之明子為大政其何厲之有昔堯殛鯀鯀於羽山其神化為黃熊以入於羽淵實為夏郊三代祀之晉為盟主其或者未之祀也乎韓子祀夏郊晉侯有間賜子產莒之二方鼎子產為豐施歸州田於韓宣子曰日君以夫公孫

段為能任其事而賜之州田今無祿早世不獲久享君德其子弗敢有不敗以聞於君私致諸子宣子辭子產曰古人有言曰其父析薪其子弗克負荷施將懼不能任其先人之祿其況能任大國之賜縱吾子為政而可後之人若屬有疆場之言敝邑獲戾而豐氏受其大討吾子取州是免敝邑於戾而建置豐氏也敢以為請宣子受之以告晉侯晉侯以與宣子宣子為初言病有之以易原縣於樂大心鄭人相驚以伯有曰伯有至矣則皆走不知所往鑄刑書之歲二月或夢伯有介而行曰壬子余將殺帶也明年壬寅余又將殺段也及壬子駟帶卒國人益懼齊燕平之月壬寅公孫段卒國人愈懼其明月子產立公孫洩及良止以撫之乃止子太叔問其故子產曰鬼有所歸乃不為厲吾為之歸也太叔曰公孫洩何為子產曰說也為身無義而圖說從政有所反之以取媚也不媚不信不信民不從也及子產適晉趙景子問

馬曰伯有猶能為鬼乎子產曰能人生始化曰魄既生魄陽曰魂用物精多則魂魄彊是以有精爽至於神明匹夫匹婦彊死其魂魄猶能馮依於人以為淫厲況良霄我先君穆公之胄子良之孫子耳之子敝邑之卿從政三世矣鄭雖無腆抑諺曰蕞爾國而三世執其政柄其用物也弘矣其取精也多矣其族又大所馮厚矣而彊死能為鬼不亦宜乎子皮之族飲酒無度故馬師氏與子皮氏有惡齊師還自燕之月罕朔殺罕魋罕朔奔晉韓宣子問其位於子產子產曰君之羈臣苟得容以逃死何位之敢擇卿違從大夫之位罪人以其罪降古之制也朔於敝邑亞大夫也其官馬師也獲戾而逃唯執政所寘之得免其死為惠大矣又敢求位宣子為子產之敏也使從嬖大夫

羽山杜注在東海祝其縣西南今兗州府沂州東南一百里有山高四里周廣八里其西為羽淵

秋八月戊辰衛侯惡卒

左傳

秋八月衛襄公卒晉大夫言於范獻子曰衛事

貳詩曰鵠鵠在原兄弟急難又曰死喪之威兄弟孔

懷

兄弟之不睦於是乎不弔況遠人誰敢歸之今又

不禮於衛之嗣衛必叛我是絕諸侯也獻子以告韓

宣子

宣子說使獻子如衛弔且反戚田衛齊惡告喪

於周且請命王使成簡公如衛弔且追命襄公曰叔

父陟

恪在我先王之左右以佐事上帝余敢忘高圉

亞圉

穀梁

鄉曰衛齊惡今日衛侯惡此何為君臣同名也

君子

不奪人名不奪人親之所名重其所以來

也王父名子也

集說 劉氏敞曰衛侯惡卒穀梁曰王父名子也蓋言臣之子不敢與世子同名有生在世子前王父名之者則亦不改也以言衛齊惡蓋王父名之爾說者不曉以謂唯王父名子王父卒則稱王父命名之是則不可

## 九月公至自楚

左傳 九月公至自楚孟僖子病不能相禮乃講學之苟能禮者從之及其將死也召其大夫曰禮人之幹也無禮無以立吾聞將有達者曰孔丘聖人之後也而滅於宋其祖弗父何以有宋而授厲公及正考父佐戴武宣三命茲益共故其鼎銘云一命而僇再命而偃三命而俯循牆而走亦莫余敢侮饁於是鬻於是以餬余口其共也如是滅孫紇有言曰聖人有明德者若不當世其後必有達人今其將在孔丘

乎我若獲沒必屬說與何忌於夫子使事之而學禮  
馬以定其位故孟懿子與南宮敬叔師事仲尼仲尼  
曰能補過者君子也詩曰君子  
是則是效孟僖子可則效已矣

集說

汪氏克寬曰自如楚令七  
越月危公之意可見矣

附錄左傳

單獻子棄親用羈冬十月辛酉  
襄頃之族殺獻公而立成公

# 冬十有一月癸未季孫宿卒

左傳

十一月季武子卒晉侯謂伯瑕曰吾所問日食  
從矣可常乎對曰不可六物不同民心不壹事

序不類官職不則同始異終胡可常也詩曰或燕燕  
居息或憔悴事國其異終也如是公曰何謂六物對  
曰歲時日月星辰是謂也公曰多語寡人辰而  
莫同何謂辰對曰日月之會是謂辰故以配日



集說

趙氏鵬飛曰季氏之有宿李氏之禍也非幸也季友之賢聞於諸侯天下貴之繼而文子相二

君儉德昭著魯人懷之不幸而得宿為成季文子之辱大矣所貴乎有子者以其賢而克家也今季氏之有宿自當時觀之奪公室之權執魯國之命其亦尊矣自今評之不免為逆臣以成季文子之後而世有逆臣庸為季氏之福乎家氏鉉翁曰自季友至行父雖專魯國猶無悖於臣節至於宿乘主幼盜兵權伐國取地以自私襄公幾為所逐自後世言司馬懿其人也至昭師遂移宗杜意如逐君宿所命也其魯之大盜歟汪氏克寬曰此季文子之子武子也子紇嗣是為悼子

# 十有二月癸亥葬衛襄公

左傳

衛襄公夫人姜氏無子嬖人嬖始生孟縶孔成子夢康叔謂已立元余使羈之孫圉與史苟相

之史朝亦夢康叔謂已余將命而子苟與孔烝鉏之  
曾孫圉相元史朝見成子告之夢夢協晉韓宣子為  
政聘於諸侯之歲嫺始生子名之曰元孟絜之足不  
良弱行孔成子以周易筮之曰元尚享衛國主其社  
稷遇屯又曰余尚立絜尚克嘉之遇屯之比以示史  
朝史朝曰元亨又何疑焉成子曰非長之謂乎對曰  
康叔名之可謂長矣孟非人也將不列於宗不可謂  
長且其繇曰利建侯嗣吉何建建非嗣也二卦皆云  
子其建之康叔命之二卦告之筮襲於夢武王所用  
也弗從何為弱足者居侯主社稷臨祭祀奉民人事  
鬼神從會朝又馬得居各以所利不亦可乎  
故孔成子立靈公十二月癸亥葬衛襄公

丁景王十一年八年晉平二十四年齊景十四年衛靈公元  
卯一年八年元蔡靈九年鄭簡三十二年曹武二

十一年陳哀三十五年杞平二年宋平四  
十二年秦哀三年楚靈七年吳夷末十年

# 春

附錄左傳

八年春石言於晉魏榆晉侯問於師曠曰

聽濫也抑臣又聞之曰作事不時怨讎動於民則有  
非言之物而言今宮室崇侈民力彫盡怨讎竝作莫  
保其性石言不亦宜乎於是晉侯方築虎祁之宮叔  
向曰子野之言君子哉君子之言信而有徵故怨遠  
於其身小人之言僭而無徵故怨咎及之詩曰哀哉  
不能言匪舌是出唯躬是瘁哿矣能言巧言如流俾  
躬處休其是之謂乎是宮也成諸  
侯必叛君必有咎夫子知之矣

魏榆杜注晉地服虔曰魏邑榆州里名今山西太  
原榆次縣西北有榆次故城通典曰晉魏榆邑也

虎祁杜注地名在絳西四十里臨汾水今在平  
陽府曲沃縣西水經注汾水西逕虎祁宮北有故

梁截汾水中凡三十柱柱  
遷五尺蓋晉平公時物也

# 陳侯之弟招殺陳世子偃師

左傳

陳哀公元妃鄭姬生悼太子偃師二妃生公子

與公子過哀公有廢疾三月甲申公子  
招公子過殺悼太子偃師而立公子留

穀梁

鄉曰陳公子招今曰陳侯之弟招何也曰盡其

何也世子云者唯君之貳也云可以重之存焉志之

也諸侯之尊兄弟不得以屬通其弟云者親之也親

而殺之

惡也

胡傳此公子招特以弟稱者著招憑寵稔惡而陳侯  
失親親之道也招以公子為司徒乃貴戚之卿

親則介弟尊則叔父號令廢立自己而出莫敢干之者也不能援立嫡冢安靖國家而逢君之惡戕殺偃師以致大寇宗社覆沒罪固大矣陳侯信愛其弟何以為失親親乎尊賢者親親之本不能擇親之賢者厚加尊寵以表儀公族而徇其私愛施於不令之人以致亡國敗家豈不失親親之道乎其曰陳侯之弟招殺陳世子偃師交貶之也

集說 孫氏復曰陳哀公二子太子偃師次子留公弟招與大夫過皆愛留欲立之哀公疾遂殺太子偃師以立之留庶孽也偃師冢嗣也招以叔父之親不顧宗社之重殞冢嗣以立庶孽致楚滅陳皆招之由也故曰陳侯之弟招殺陳世子偃師以甚招之惡也 許氏翰曰陳哀寵其庶子資以彊輔而濟之權以軋太子使之失職至於亂作躬受其禍惟其溺愛法不勝私也悲夫 汪氏克寬曰隱七年傳書盟書

帥師而稱弟者罪其有寵愛之私今案此書殺世子亦罪其寵任之私也又曰經書殺世子者三晉獻嬖奚齊卓子而殺申生宋平嬖佐而殺痤陳哀嬖留而殺偃師皆嬖子匹嫡之禍也然申生痤之誅權在於晉宋之君故雖亂國而不至於亡陳哀基怨造禍勢不兩全遂至寵弟戕其國本而且以憂殞其身而國隨以亡矣其罪得不又甚於晉獻宋平者歟故申生與痤皆目君以殺唯偃師之殺目陳侯之弟招夫以弟招繫之陳侯則陳哀之罪章章明矣不曰殺其世子而重舉國者偃師非招之世子也下書楚滅陳執招放之以見楚之滅陳託於討招而公子留之嬖實亡陳之本也歟金氏賢曰偃師之死孰殺之耶曰陳哀公殺之也陳招殺偃師而曷謂哀公耶曰陳招之禍哀公啟之也哀公曷為啟之曰因女寵之禍以至於此也招何以不稱公子而稱弟曰稱弟者累乎其兄之詞也以見偃師之死哀公與招為之耳夫哀

公以留屬二公子私之也雖曰私之而未有立之意也無意立留則無殺偃師之情矣何以知之以聞招之亂而自縊知之也招穿窬小人貪位固寵逆兄之邪逢君之惡遂殺嫡立庶致大寇覆宗祀招之惡可勝誅哉雖然無哀公之屬亦無招之禍矣故陳之亂也吾不曰陳招而曰哀公書曰陳侯之弟交罪之也

## 夏四月辛丑陳侯溺卒

左傳

夏四月辛丑哀公縊

集說嚴氏啟隆曰因偃師之變恚而卒是則哀雖寵留非有殺偃師之志也偃師殺而哀始痛求死無地矣廢立之際間不容髮顧欲兩利而俱存之哀之愚不亦甚哉

# 叔弓如晉

左傳

叔弓如晉賀虎祁也游吉相鄭伯以如晉亦賀

也而又賀之子太叔曰甚哉其相蒙也可弔也其非唯我賀將天下實賀

集說

許氏翰曰財費則國貧役煩則民叛締構雕琢

弔而諸侯賀之是以人君安於危亡而不自知蓋諛之者衆也當楚之隆勢傾諸國而晉弗慮圖惟宮室之崇以為安榮平公可謂志卑矣

# 楚人執陳行人干徵師殺之

左傳

干徵師赴於楚且告有立君公子勝愬之於楚楚人執而殺之公子留奔鄭書曰陳侯之弟招



殺陳世子偃師罪在招也楚人執陳  
行人干徵師殺之罪不在行人也

集說

劉氏敞曰稱人以執者非伯討也此其為非伯

古者兵交使在其間可也家氏鉉翁曰陳殺太子  
罪在一招行人何罪而以為戮乎蓋靈因陳亂以為  
利殺人以行其詐也汪氏克寬曰穀梁云稱人以  
執大夫執有罪也非也書曰行人則非有罪矣苟曰  
有罪何為不以殺夏  
徵舒之例書之乎

## 陳公子留出奔鄭

集說

杜氏預曰留為招所立未成君而出奔孫氏  
復曰公子留已立復稱公子者以著公弟招殺

世子偃師之罪且明留之不當立也高  
氏閏曰偃師曰世子留曰公子別嫡庶也

秋蒐于紅

蒐所求反  
書蒐始此

左傳

秋大蒐于紅自根牟  
至於商衛草車千乘

紅杜注魯地沛國蕭縣西有紅亭達疑蕭縣今屬  
江南徐州本宋地去魯為遠商杜注宋地魯西

竟接宋

衛也

公羊

蒐者何簡  
車徒也

穀梁

因蒐狩以習用武事禮之大者也艾蘭以為防  
置旃以為轅門以葛覆質以為禁流旁握御擊

者不得入車軌塵馬候蹄掩禽旅御者不失其馳然  
後射者能中過防弗逐不從奔之道也面傷不獻不  
成禽不獻禽雖多天子取三十馬其餘與士眾以習  
射於射宮射而中田不得禽則得禽田得禽而射不

中則不得禽是以知古之貴仁義而賤勇力也

胡傳

蒐春事也秋興之則違天時有常所矣其于紅則易地利三家專行公不與焉而兵權在臣下

則悖人理此亦直書其事不待貶絕而自見者也凡亂臣之欲竊國命必先為非禮以動民而後上及於君父昭公至是民食於他不恤其所昧於履霜之戒甚矣

集說

杜氏預曰草車千乘不言大者經文闕也劉氏敞曰何以書譏蒐春事也秋興之非正也蒐

有常地矣于紅亦非正也然則曷為不言公公不得與於蒐爾三家專魯而分之政令出焉公民食焉爾又曰姦臣之將蔽其君而奪之也未嘗不先為非禮而動民也蒐于紅吾見其反天時矣吾見其易地理矣吾見其悖人倫矣而昭公猶未之悟也至於奔走失其社稷以死豈不哀哉又曰秋蒐于紅穀梁曰正

也非也蓋不學周禮者胡氏寧曰昭定之蒐皆不言公權在三家也陳氏傅良曰蒐狩不書必違禮而後書於是舍中軍四分公室李氏擇二子各一皆盡征之而貢於公蒐于紅也草車千乘皆三家之師也自是而屢蒐三家所以耀武焉爾是故桓莊之狩必言公昭定之蒐不言公矣薛氏季宣曰春田而秋行之于紅非常處也非時之狩不於其常地見三家之擅也舍中軍變蒐禮見兵權之移於下且奪民時也家氏鉉翁曰自是迄定哀之世凡四蒐脩書於策著季氏挾兵權以脅制其上為魯憂耳齊氏履謙曰春秋凡五書蒐皆言大蒐此傳亦言大蒐于紅自根牟至於商衛革車千乘而經無大字者闕文也大蒐者簡車徒也在他公不書惟書於昭定者當二公在位君不得有其國而奪於大夫大夫不得專其政而制於陪臣私邑內叛日虞干戈軍旅困弊名侈實違故屢假蒐田之禮以聲威於國人狩者意

在從禽故書公以斥其惡蒐者本於耀武故言大以見其夸李氏廉曰經書蒐五昭十一年夏比蒲二十二年春昌間定十三年夏比蒲十四年秋比蒲皆書大者用天子大蒐之禮也此年不書大者杜氏以為經闕者或然至謂時史闕略仲尼略而從之者非也蒐狩合禮者常事不書非時非地及越禮則書之而穀梁以秋蒐為正公羊以為以罕書以亟書者皆非也其胡氏陳氏詳矣趙氏恒曰此後凡書蒐俱與公無與矣民皆公室之民則蒐亦公室之蒐自三軍作舍民屬私家故蒐皆三家之事

附錄左傳

七月甲戌齊子尾卒子旗欲治其室丁丑殺梁嬰八月庚戌逐子成子工子車皆來

奔而立子良氏之宰其臣曰孺子長矣而相吾室欲兼我也授甲將攻之陳桓子善於子尾亦授甲將助之或告子旗子旗不信則數人告將往又數人告於道遂如陳氏桓子將出矣聞之而還游服而逆之請

命對曰聞彊氏授甲將攻子子聞諸曰弗聞子盍亦授甲無字請從子旗曰子胡然彼孺子也吾誨之猶懼其不濟吾又寵秩之其若先人何子盍謂之周書曰惠不惠茂不茂康叔所以服弘大也桓子稽顙曰頃靈福子吾猶有望遂和之如初

# 陳人殺其大夫公子過

過古禾反

左傳

陳公子招歸罪於公子過而殺之

集說

陸氏淳曰淳聞於師曰春秋之作本以懲姦慝也夫子以招推罪於過故獨書招殺太子也不

書招殺過過之罪自當死宜為國討也孫氏復曰此公子招殺大夫公子過也其言陳人殺其大夫公子過者不與公子招殺也故以陳人自討為文家氏鉉翁曰過與招同為亂招委罪於過而殺之招與

過但首從之不同耳不去其官其罪亞也 吳氏澂  
曰案哀公屬留於招與過故招過同殺太子二人之  
罪均也招畏國人公論懼楚人來討故歸罪於過而  
欲免己人其可欺乎 鄭氏玉曰過不去大夫公子  
所以明招之為首使招不得  
以過說於楚以掩其罪也

大雩

冬十月壬午楚師滅陳執陳公子招放之于越殺陳孔

奂

奂公作環

左傳

九月楚公子棄疾帥師奉孫吳圍陳宋戴惡會之冬十一月壬午滅陳興嬖袁克殺馬毀玉以

葬楚人將殺之請寘之既又請私私於幄加經於顙而逃使穿封戌為陳公曰城麋之役不諂侍飲酒於

王王曰城麋之役女知寡人之及此女其辟寡人乎  
對曰若知君之及此臣必致死禮以息楚晉侯問於  
史趙曰陳其遂亡乎對曰未也公曰何故對曰陳顓  
頊之族也歲在鶉火是以卒滅陳將如之今在析木  
之津猶將復由且陳氏得政於齊而後陳卒亡自幕  
至于瞽瞍無違命舜重之以明德寘德於遂遂世守  
之及胡公不淫故周賜之姓使祀虞帝臣聞盛德必  
百世祀虞之世數未也繼守將在齊其兆既存矣

穀梁

惡楚  
子也

集說

徐氏邈曰楚莊入陳先書殺者彼乃楚子行義  
故先書其殺今楚子託義討賊書在滅後見其

本懷滅心也

陸氏淳曰淳聞於師曰招殺世子之

賊也宥而放之免招之黨也執而殺之楚子滅人之

國又為淫刑此不待貶絕而惡見者也胡氏寧曰

楚師滅陳曷為不以號舉而稱師見挾衆恃彊肆行



暴虐莫之較也公子招固有罪矣當莊王之殺微舒也置其君而反焉今執招而遂滅陳招雖有罪而猶以公子書之見楚子懷惡而執招不與其執也孔奭嘗與楚子通謀以滅陳者旋以不忠見戮奭陳之賊臣也蓋殺世子偃師招實主謀而孔奭行之故書曰殺陳孔奭不言大夫非陳之大夫也家氏鉉翁曰陳自晉悼鄰之會逃盟迨三十四年謂楚可託國今乘陳招殺太子而掩取其國挾義聲以行其大不義春秋自春秋但冬凡七書陳事閔陳而罪楚也李氏廉曰楚之討罪四殺微舒也執慶封也執公子招也誘蔡侯般也書法皆不同春秋之權度審矣

案楚莊討陳之亂有善有惡故先書殺夏徵舒而後及其入國納淫之事是非不相掩也圍恃彊行暴利陳之土地而滅之非有討賊之義故先書滅陳

# 葬陳哀公

穀梁

不與楚滅  
閔公也

集說

杜氏預曰嬖人袁克葬之孔氏穎達曰賈服

故杜

以葬哀公之文在穀孔奐之下以為楚葬哀公

葬紀

伯姬不得直言葬也楊氏士勛曰滅國不葬

今書

葬者以楚無道滅人閔陳之滅故書葬以存之

孫氏

復曰十月壬午楚師滅陳此言葬陳哀公如

不滅

之辭者所以存陳也九年陳災同此鄭氏玉

曰孔

奐以為有罪則傳無其文以為無罪則經去其

官恐

只謂招以首惡而得放奐以黨與而被殺譏楚

用刑

之頗耳然無所考姑闕之余氏光曰郭氏曰

案陳

哀侯嬖其二妃生公子留母嬖而子寵故托留

於其弟

司徒招及公子過使扶持左右之招因哀侯

有廢疾遂殺偃師而立留哀侯因是憂恚自殺蓋殺偃師非哀侯卒意特托非其人致子死而身亡國亦隨滅嬖子匹嫡而禍至於如此之懽君人者可不為永鑒哉

案趙氏謂陳已滅矣袁克非大臣何能辨葬死君又何能告諸侯使會葬黎氏謂陳為楚師所據魯豈於其葬而使臣往會之蓋楚入陳自以其君在殯因取而葬之與莊四年齊侯葬紀伯姬同彼目齊者蓋上文無齊滅紀之文今已書楚師滅陳則下云執公子招殺孔奭葬哀公皆蒙上文云夫齊襄之暴不滅楚靈齊襄滅紀而葬其夫人以示禮楚靈滅陳而葬其故君以示恩其校偽之智正相符合二家謂為楚葬立說固似有理然左傳明言與嬖袁克殺馬毀玉以葬且從傳文可也至其駁杜注魯往會葬之說則有確乎不可易者楚既滅陳諸侯震恐故下文九年春魯使叔弓會楚子于陳以致其敬豈有未加敬於楚

之前反先使人如陳會葬陳君之理蓋必魯往會葬而後書者常例也獨此役魯未往會葬而變例得書者是亦所謂存陳之意而已矣

戊景王十辰二年 九年 晉平二十五年齊景十五年衛靈二年

年杞平三年宋平四十三年秦哀四年楚靈八年吳夷末十一年

# 春叔弓會楚子于陳

左傳

九年春叔弓宋華亥鄭游吉衛趙厲會楚子于陳

集說

杜氏預曰楚子在陳故四國大夫往不行會禮故不總書孔氏穎達曰此與宣十五年公孫

歸父會楚子于宋其事同也楚子在彼魯敬大國自往會之非楚子召使會自以小國事大國之禮往

王氏沿曰內朝聘皆言如今楚子在陳不可言如陳故以會為文春秋不與楚滅陳故上書葬哀公下書陳災今書叔弓會楚子于陳皆以存陳也許氏翰曰楚既滅陳威震諸夏是以無所號召而諸國之大夫會之陳氏傅良曰諸夏之大夫旅見於楚於是始舉魯以見其餘也家氏鉉翁曰繼滅陳而書譏也楚滅人之國天下所當同嫉魯以望國倡諸侯預會故譏

## 許遷于夷

左傳二月庚申楚公子棄疾遷許于夷實城父取州來淮北之田以益之伍舉授許男田然丹遷城父人於陳以夷濮西田益之遷方城外入於許

城父杜注城父縣屬譙郡今江南鳳陽府亳州東南七十里有城父故城夷濮西田杜注夷田在

濮水西者水經注夏肥水上承沙水東南逕城父縣故城春秋所謂夷田在濮水西者也蓋濮水亦稱沙水

集說孔氏穎達曰許自楚莊王以來世屬於楚常與鄭為讎敵今畏鄭欲遷都近楚楚從其意而遷之故以許自遷為文若許不欲遷而楚彊遷之則當云楚人遷許如宋人遷宿齊人遷陽杜氏諤曰許自成十五年遷于葉至此又遷于夷春秋詳錄以見許之危弱不能自守矣程氏端學曰王綱不振諸侯吞噬不安厥居至於再遷雖許男不能治其國家然可以觀世變矣汪氏克寬曰夷一名城父本陳地楚滅陳遂遷許於此也

附錄左傳

周甘人與晉閻嘉爭閻田晉梁丙張趯率陰戎伐潁王使詹桓伯辭於晉曰我自夏

以後稷魏駘芮岐畢吾西土也及武王克商蒲姑商  
奄吾東土也巴濮楚鄧吾南土也肅慎燕亳吾北土  
也吾何邇封之有文武成康之建母弟以蕃屏周亦  
其廢隊是為豈如弁髦而因以敝之先王居擣扞於  
四裔以禦螭魅故允姓之姦居於瓜州伯父惠公歸  
自秦而誘以來使偪我諸姬入我郊甸則戎焉取之  
誰之咎也后稷封殖天下今戎制之不亦難乎伯父  
圖之我在伯父猶衣服之有冠冕木水之有本原民  
人之有謀主也伯父若裂冠毀冕拔本塞原專棄謀  
主雖戎狄其何有余一人叔向謂宣子曰文之伯也  
豈能改物翼戴天子而加之以共自文以來世有衰  
德而暴滅宗周以宣示其侈諸侯之貳不亦宜乎且  
王辭直子其圖之宣子說王有姻喪使趙成如周弔  
且致閭田與棧反潁俘王亦使賓滑執甘大夫襄以  
說於晉晉人  
禮而歸之

閭田杜注以閭嘉為晉閭縣大夫則閭當屬晉左氏載甘人與嘉爭則閭蓋與甘相近之地陰戎杜注陸渾之戎陸渾故城在今河南河南府嵩縣北二十里僖二十二年秦晉遷陸渾之戎于伊川是也潁杜注周邑駘杜注駘在始平武功縣所治釐城今縣屬陝西西安府乾州古釐城在縣南八里明置郃城驛于此蒲姑杜注樂安博昌縣北有蒲姑城史記作薄姑今山東青州府博興縣東南十五里有薄姑故城肅慎杜注在元菟北三千餘里韋昭曰肅慎去扶餘千里孔疏元菟在遼東北金為上京會寧府今屬盛京

夏四月陳災

災公穀作火

左傳

夏四月陳災鄭裨竈曰五年陳將復封封五十二年而遂七子產問其故對曰陳水屬也火水



妃也而楚所相也今火出而火陳逐楚而建陳也妃以五成故曰五年歲五及鶉火而後陳卒亡楚克有之天之道也故曰五十二年

公羊

陳已滅矣其言陳火何存陳也

穀梁

國曰災邑曰火火不志此何以志閔陳而存之也

胡傳

凡外災告則書今楚已滅陳夷於屬縣使穿封成爲公矣必不遣使告於諸侯言亡國之有天

災也何以書於魯國之策乎當是時叔弓與楚子會于陳則目擊其事矣雖彼不來告此不往弔叔弓使畢而歸語陳故也魯史遂書之耳或曰國史所書必承赴告豈有憑使人之言而載之於史者曰周景王崩有尹單猛朝之變固無赴告矣叔鞅至自京師言王室之亂也春秋承其言遂書於策亦此類耳仲尼

作經存而弗革者蓋興滅國繼絕世以堯舜三代公  
天下之心為心異於孫秦罷侯置守欲私一人以自  
奉者所以歸民心合天德也

穀梁以為存陳得其旨矣

集說

劉氏敞曰何休謂陳為天所存非也此自聖人  
欲存之故錄爾安知天意高氏閏曰陳雖為

楚所滅而土地居民猶在焉聖人不與楚滅之也故  
還繁之陳如邶鄰二國既為衛所并聖人還存邶鄰  
之風亦不與衛人并諸侯而存天子之建國也朱  
子曰漢建安二十五年之初漢尚未亡通鑑便作魏  
黃初元年奪漢太速與魏太遽大非春秋存陳之意  
家氏鉉翁曰陳已為楚所縣俾其臣僭爵以居之  
而猶書陳災者以盛德之後見翦於

楚特著義存之耳不與楚得陳也

案陳已滅而經書陳災公穀皆以為存陳而胡傳因  
之蓋不與楚之滅陳也公羊又謂執人之罪人殺人

之賊葬人之君則楚之滅陳似不失為仗義之師矣殊非經旨

附錄左傳

晉荀盈如齊逆女還六月卒于戲陽殯于絳未葬晉侯飲酒樂膳宰屠蒯趨入請佐

公使尊許之而遂酌以飲工曰女為君耳將司聰也辰在子卯謂之疾日君徹宴樂學人舍業為疾故也君之卿佐是謂股肱股肱或虧何痛如之女弗聞而樂是不聰也又飲外嬖嬖叔曰女為君目將司明也服以旌禮禮以行事事有其物物有其容今君之容非其物也而女不見是不明也亦自飲也曰味以行氣氣以實志志以定言言以出令臣實司味二御失官而君弗命臣之罪也公說徹酒初公欲廢知氏而立其外嬖為是悛而止秋八月使荀躒佐下軍以說焉

秋仲孫矍如齊

矍俱縛反

左傳

孟僖子如齊  
殷聘禮也

集說

杜氏預曰自叔老聘齊至今二十年禮意久曠  
今修盛聘以無忘舊好 孫氏復曰饒仲孫羯

子

# 冬築郎囿

左傳

冬築郎囿季平子欲其速成也叔孫昭子曰詩  
曰經始勿亟庶民子來焉用速成其以勦民也

無囿猶可無

民其可乎

集說

許氏翰曰公內制於彊臣外輕於大國亂七危  
辱兆矣是之弗慮而築郎囿知公之志日以荒

也

張氏洽曰以左傳觀之有以見意如達其君以  
耳目之娛而竊其權昭公安之而不悟也人君於此

可不戒哉 家氏鉉翁曰桓四年公狩于郎莊三十一年築臺于郎今復築郎以為圓非以為講武之處特以為游觀之地耳是時三家用事魯君擁虛器而猶興築圓之役其為季氏毆民乎 俞氏皋曰創立例書築圓有垣之苑也勦民力以為耳目之娛故書以為後世戒左氏書時之說非也觀叔孫昭子之言可知矣

已景王十年 晉平二十六年齊景十六年衛靈三年已三年 蔡靈十一年鄭簡三十四年曹武二十三年杞平四年宋平四十四年秦哀五年楚靈九年吳夷末十二年

## 春王正月

附錄左傳

十年春王正月有星出於婺女鄭裨竈言於子產曰七月戊子晉君將死今茲歲在

顓頊之虛姜氏任氏實守其地居其維首而有妖星  
焉告邑姜也邑姜晉之妣也天以七紀戊子逢公以  
登星斯於是乎  
出吾是以譏之

# 夏齊樂施來奔

齊公  
作晉

左傳惡之夏有告陳桓子曰子旗子良將攻陳鮑氏而  
告鮑氏桓子授甲而如鮑氏遭子良醉而騁遂見文  
子則亦授甲矣使視二子則皆將飲酒桓子曰彼雖  
不信聞我授甲則必逐我及其飲酒也先伐諸陳鮑  
方睦遂伐樂高氏子良曰先得公陳鮑馬往遂伐虎  
門晏平仲端委立於虎門之外四族名之無所往其  
徒曰助陳鮑乎曰何善焉助樂高乎曰庸愈乎然則  
歸乎曰君伐焉歸公召之而後入公卜使王黑以靈  
姑鉅率吉請斷三尺馬而用之五月庫辰戰於稷樂

高敗又敗諸莊國人追之又敗諸鹿門樂施高彊來  
奔陳鮑分其室晏子謂桓子必致諸公讓德之主也  
讓之謂懿德凡有血氣皆有爭心故利不可彊思義  
為愈義利之本也蘊利生孽姑使無蘊乎可以滋長  
桓子盡致諸公而請老於莒桓子召子山私具幄幕  
器用從者之衣屨而反棘馬子商亦如之而反其邑  
子周亦如之而與之夫子反子城子公公孫捷而皆  
益其祿凡公子公孫之無祿者私分之邑國之貧約  
孤寡者私與之粟曰詩云陳錫載周能施也桓公是  
以霸公與桓子莒之旁邑辭穆孟姬為之請高唐陳  
氏始大

稷杜注祀后稷之處六國時齊有稷下館在今山  
東青州府臨淄縣古臨淄城西棘杜注子山故  
邑齊國西安縣東有戟里亭後漢志作棘里今臨  
淄縣西北有棘里亭夫子杜注濟南於陵縣西

北有于亭今於陵城在長山  
縣南二十里屬山東濟南府

集說

蘓氏轍曰齊樂施高彊皆嗜酒而惡陳氏鮑氏陳鮑及其醉而攻之不勝遂來奔高彊不書非

卿也

王氏葆曰公羊以為晉臣蓋見晉有樂氏而

誤爾

高氏閏曰魯方通聘而受其奔亡之臣非義

也

湛氏若水曰書齊

樂施來奔罪納亡也

秋七月季孫意如叔弓仲孫矍帥師伐莒

意公作  
隱後同

左傳

秋七月平子伐莒取郟獻俘始用人於亳杜城武仲在齊聞之曰周公其不饗魯祭乎周公饗

義魯無義詩曰德音孔昭視民不佻佻之謂甚矣而壹用之將誰福哉

鄭杜注莒邑當

在沂水縣界



集說

杜氏預曰三大夫皆卿故書之季孫為主二子從之王氏治曰三子伐莒皆書者惡其專國

而公不得為政也王氏葆曰經書三卿而傳止書平子則季孫主兵也高氏閏曰是時魯間晉之衰

故三卿帥師同伐莒欲一舉滅之而三卿擅以為已功也陳氏傅良曰舍中軍矣曷為書三卿帥師四

分公室叔弓為意如貳也襄十年作三軍而三分公室三家各將其一昭五年舍中軍而四分公室季氏

擇二二子各一於是伐莒叔弓佐意如序於仲孫矍之上而叔孫婼守自是迄春秋魯有四卿而權歸三

家也趙氏鵬飛曰魯乘莒亂取鄆田納牟邑而取牟婁及防茲無怪莒有蚡泉之師也叔弓且敗之矣

今又三大夫並出此固皆意如之為也家氏鉉翁曰叔弓非叔孫氏乃臨事所置之帥

案胡傳謂三家四分公室季孫身為主將二子各帥一軍為之副蓋不知叔弓為叔肸後而誤以為叔孫

氏也項氏安世遂以為叔孫舍賢猶使公臣帥家徒則亦因胡傳而遷就之耳當以陳氏傳良之說為正

### 戊子晉侯彪卒

左傳

戊子晉平公卒鄭伯如晉及河晉人辭之游吉遂如晉

### 九月叔孫舍如晉葬晉平公

左傳

九月叔孫婁齊國弱宋華定衛北宮喜鄭罕虎許人曹人莒人邾人滕人薛人杞人小邾人如

晉葬平公也鄭子皮將以幣行子產曰喪馬用幣用幣必百兩百兩必千人千人至將不行不行必盡用之幾千人而國不亡子皮固請以行既葬諸侯大夫欲因見新君叔孫昭子曰非禮也弗聽叔向辭之曰大夫之事畢矣而又命孤孤斬焉在衰經之中其以嘉服見則喪禮未畢其以喪服見是重受弔也大

夫將若之何皆無辭以見子皮盡用其幣歸謂子羽曰非知之實難將在行之夫子知之矣我則不足書曰欲敗度縱敗禮我之謂矣夫子知度與禮矣我實縱欲而不能自克也昭子至自晉大夫皆見高彊見而退昭子語諸大夫曰為人子不可不慎也哉昔慶封七子尾多受邑而稍致諸君君以為忠而甚寵之將死疾於公宮輦而歸君親推之其子不能任是以在此忠為令德其子弗能任罪猶及之難不慎也喪夫人之力棄德曠宗以及其身不亦害乎

詩曰不自我先不自我後其是之謂乎

集說

李氏蘄曰平公在位二十五年有涖梁祝柯澶淵商任沙隨夷儀重丘澶淵于宋澶淵于虢之

會盟是時承悼公之後諸侯亦和但除祝柯圍齊無貶之外其餘皆無足取也

十有二月甲子宋公成卒

成公作戌

左傳

冬十二月宋平公卒初元公惡寺人柳欲殺之及喪柳熾炭於位將至則去之比葬又有寵

集說

孫氏復曰此年無冬者脫也汪氏克寬曰何休謂昭公取吳孟子之年故賤之非也桓公四

年七年削秋冬而賤之則皆不書事與月此年書十二月宋公卒而脫冬一字則傳受承誤而漏之耳況

經無取孟子之文安得妄說耶

庚景王十

十有一年

晉昭公元年齊景十七年衛靈十四年蔡靈十二年鄭簡三十五年

曹武二十四年杞平五年宋元公佐元年秦哀六年楚靈十年吳夷末十三年

春王二月叔弓如宋葬宋平公

二月公作正月

左傳

十一年春王二月叔弓如宋葬平公也

集說

高氏閔曰卿共盟主之葬猶可言也卿共同列之葬非禮甚矣

夏四月丁巳楚子虔誘蔡侯般殺之于申

虔穀或作般音班

左傳

景王問於萇弘曰今茲諸侯何實吉何實凶對曰蔡凶此蔡侯般弑其君之歲也歲在豕韋弗

過此矣楚將有之然壅也歲及大梁蔡復楚凶天之道也楚子在申召蔡靈侯靈侯將往蔡大夫曰王貪而無信唯蔡於感今幣重而言甘誘我也不如無往蔡侯不可三月丙申楚子伏甲而饗蔡侯于申醉而執之夏四月丁巳殺之刑其士七十人

公羊

楚子虔何以名絕曷為絕之為其誘討也此討賊也雖誘之則曷為絕之懷惡而討不義君子

不予也

胡傳

蔡世子般弑其君楚子若以大義唱天下奉詞致討執般於蔡殘其身殯其宮室謀於蔡衆置

君而去雖古之征暴亂者不越此矣今虔卒心欲圖

其國不為討賊舉也而又挾欺毀信重幣甘言詐誘

其君執而殺之肆行無道貪得一時流毒於後棄疾

以是殺我蠻商鞅以是紿魏將秦人以是刳懷王傾

危成俗天下大亂聖人深惡

楚虔而名之也其慮遠矣

集說

孫氏復曰般弑逆之人諸侯皆得殺之楚子名者楚子暴虐無道貪蔡土地不以弑君之罪殺

般也四月丁巳楚子虔誘蔡侯般殺之于申十有一

月丁酉楚師滅蔡執蔡世子有以歸用之此暴虐無

道貪蔡土地不得以討賊例當坐誘殺蔡侯般也

蘇氏轍曰般有弑君之罪而諸侯不能討十三年楚

子將滅蔡而以好名蔡侯殺之因以滅蔡非討其罪

也故名楚子而書其誘所以深罪楚子也若蔡侯之

罪則見於其弑矣。高氏閭曰：蔡般弑逆之罪，雖義當討，而楚子亦弑逆之賊也。以賊討賊，何辨曲直？況楚子非真治般志在滅蔡也，故春秋書楚子虔、蔡侯般同斥其名，以見其罪同。汪氏克寬曰：襄三十年，般弑，景公而立昭元年，使大夫會訖，四年同。楚子諸侯會申，又會伐吳五年，再會伐吳。今案曹人請負芻於晉，曰：「苦以為有罪，則君列諸會矣。」雖大逆之罪，萬世不貸，然楚虔屢寵之以會禮，今利其國，顧用詭謀詐計，醉以酒而戕之，烏在其為討賊哉？楚莊殺微舒，猶曰：「假討賊之義。」今此直誘殺蔡侯，非討賊也。

## 楚公子棄疾帥師圍蔡

左傳：公子棄疾帥師圍蔡。韓宣子問於叔向曰：「楚其克乎？」對曰：「克哉！蔡侯獲罪於其君，而不能其民，天將假手於楚，以斃之。何故不克？然胙聞之不信，以幸不可再也。」楚王奉孫、孫吳以討於陳，曰：「將定而國陳。」

人聽命而遂縣之今又誘蔡而殺其君以圍其國雖幸而克必受其咎弗能久矣桀克有緒以喪其國紂克東夷而隕其身楚小位下而亟暴於二王能無咎乎天之假助不善非祚之也厚其凶惡而降之罰也且譬之如天其有五材而將用之力盡而敝之是以無極不可沒振

集說

陸氏淳曰般弑君父之賊也誘而殺之何為其不可乎楚子內利其國外託討罪故不許其誘

而責其詐也夫以大國之力而討小國之逆當聲其罪而伐之倡大義於天下今乃誘而殺之雖曰討賊實取其國蔡侯之罪自不容誅楚子之惡亦已甚矣棄疾不能諫止又帥師圍蔡此不待貶絕而惡見者也陳氏傅良曰滅不言圍此其言圍所以病晉也韓起合八國之大夫子厥慙以謀救蔡而蔡卒滅於楚言圍所以病晉也前年棄疾奉孫吳圍陳已而滅陳曷不於此焉病晉合八國于厥慙而不能師甚矣



五月甲申夫人歸氏薨

左傳

五月齊歸薨

集說

范氏甯曰昭公母胡女歸姓季氏本曰左傳以敬歸為襄夫人而齊歸乃其娣自昭元年至

哀十四年再無卒襄夫人者

而齊歸以妾書卒此何禮乎

案先儒據左氏以齊歸為敬歸之娣故有妾母稱夫人之譏何氏釋公羊則以齊歸為襄公嫡夫人與左不同季氏本謂自昭至哀再無卒襄夫人者則齊歸之為嫡亦未可定也姑竝存之

大蒐于比蒲

比音毗

左傳

大蒐于比蒲非禮也

公羊

大蒐者何簡車徒也  
何以書蓋以罕書也

胡傳

其曰大蒐越禮也君有重喪國不廢蒐不忌君也三綱軍政之本君執此以馭其下臣執此以

事其上政之大本於是乎在君有三年之感而國不廢一日之蒐則無本矣

集說

孫氏復曰蒐春田也五月不時也時又有夫人之喪劉氏敞曰大蒐者何大比也大比之禮

均土地閱老幼物六畜會車馬齊貢賦治器械三年而修之者也常事不書此何以書譏何譏爾喪不貳事夫人歸氏薨大蒐于此蒲非禮也羊舌肸曰魯君其亡乎有三年之喪而無一日之感高氏閌曰大云者僭天子之制也八年書蒐此書大蒐見三家益彊車徒日衆也夫蒐雖素定然公以夫人之喪不自臨也而大蒐不廢則是三家者以馳騁田獵間君喪也黃氏仲炎曰蒐以大名有盡物之害也喪不廢

蒐無忌君之心也所以為此者三家馬爾公不與也

汪氏克寬曰君有喪既葬卒哭而服王事大夫士

有喪既葬卒哭弁經帶從金革之事惡有

小君之喪未葬而不廢講武之常事乎

仲孫貜會邾子盟于祊祥

祊子鴆反又七林反祊祥公作侵羊祊祥杜注地闕當

在兗州府

滋陽縣境

左傳

孟僖子會邾莊公盟于祊祥修好禮也泉丘人

有女夢以其帷幕孟氏之廟遂奔僖子其僚從之盟于清丘之杜曰有子無相棄也僖子使助蘧氏之蘧反自祊祥宿於蘧氏生懿子及南宮敬叔於泉

丘人其僚無

子使字敬叔

泉丘杜注魯邑當在今

兗州府寧陽泗水間

集說

高氏閼曰始也盟蔑盟趙是魯君親與之盟今公雖以夫人之喪使釁會盟自是何忌盟拔州

仇何忌盟句繹是吾大夫與君盟魯邾之彊弱斷可知矣雖與邾盟以修好然魯人之志必欲滅邾而後已此盟豈可信耶王氏葆曰季孫當昭公有喪而講蒐禮仲孫背齊歸之殯而從會盟魯之臣子於君親盡矣家氏鉉翁曰喪不貳事既蒐僂會皆繫五月之下所以貶也汪氏克寬曰自邾倚齊靈屢致兵於魯魯藉晉霸之力湔梁祝柯兩執邾子又取其田既而魯納庶其畀我之奔邾受臧紇之奔仇隙益深至同盟重丘齊晉既睦襄二十八年邾君來朝昭元年魯會悼公之喪是以此盟浸祥以修好也

秋季孫意如會晉韓起齊國弱宋華亥衛北宮佗鄭罕

虎曹人杞人于厥慙

厥慙公作屈銀  
厥慙杜注地闕

左傳

楚師在蔡晉荀吳謂韓宣子曰不能救陳又不能救蔡物以無親晉之不能亦可知也已為盟

主而不恤亡國將焉用之秋會于厥慤謀救蔡也鄭子皮將行子產曰行不達不能救蔡也蔡小而不順楚大而弗德天將棄蔡以壅楚盈而罰之蔡必亡矣且喪君而能守者鮮矣三年王其有咎乎美惡周必復王惡周矣晉人使狐父請蔡於楚弗許

集說

杜氏預曰不書救蔡不果救孫氏復曰會于厥慤欲救蔡而不能也許氏翰曰蔡能嬰城

堅不下楚此易助也厥慤合天下之兵畏不敢救遣使請命示之不能使楚益驕有以量諸侯之力而卒取之此韓起之罪也家氏鉉翁曰般已死而虔猶頓兵於蔡諸侯共起而擊逐之義所得為也而晉之用事者庸猥無能蔡遂滅矣厥慤之會欲以何為程氏端學曰晉既失伯楚圍蔡而莫之恤八國之大

夫自為會天下之勢可知矣汪氏克寬曰春秋書八國大夫會厥怒於楚師圍蔡之後滅蔡之前則失救患之義矣夫恃彊并弱春秋之常也故厥怒之大夫不能救蔡不待貶絕而罪惡見臣弑君子弑父非常之變也故于扈之諸侯澶淵之大夫不能討賊必待貶絕以見罪惡卓氏爾康曰宋之盟以弭兵召諸侯故諸侯麇至今楚背盟肆暴欲逞無厭於陳蔡晉不能以義責之而反姑息含忍遣使請楚卑屈已甚冀保前好豈不悖哉嚴氏啟隆曰晉之不能始於趙孟而極於韓宣暮氣之不揚不可為也天下雖安忘戰則危弭兵之禍蓋至此而益見矣

附錄左傳

單子會韓宣子於戚視下言徐叔向曰單子其將死乎朝有著定會有表衣有櫓帶

有結會朝之言必聞於表著之位所以昭事序也視不過結櫓之中所以道容貌也言以命之容貌以明

之失則有關今單子為王官伯而命事於會視不登帶言不過步貌不道容而言不昭矣不道不共不昭不從無守氣矣

案厥慙之會韓起將以救蔡而蔡卒為楚滅晉之不競甚矣序列諸國之大夫非無貶也所以見晉伯之衰而諸大夫之無能為也胡傳以為力弗加則無惡亦昧於春秋之義矣當以汪氏克寬之說為正

## 九月己亥葬我小君齊歸

左傳九月葬齊歸公不感晉士之送葬者歸以語史趙史趙曰必為魯郊侍者曰何故曰歸姓也不思親祖不歸也叔向曰魯公室其卑乎君有大喪國不廢蒐有三年之喪而無一日之感國不恤喪不忌君也君無感容不顧親也國不忌君君不顧親能無卑乎殆失其國

公羊

齊歸者何昭  
公之母也

集說

何氏休曰歸氏胡女襄公  
嫡夫人 范氏甯曰齊諡

冬十有一月丁酉楚師滅蔡執蔡世子有以歸用之

有穀

友作

左傳

冬十一月楚子滅蔡用隱太子於岡山申無宇  
曰不祥五牲不相為用况用諸侯乎王必悔之

胡傳

內入國而以其君來外滅國而以其君歸皆服  
而以之易詞也既書滅蔡矣又書執蔡世子有

者世子無降服之狀彊執以歸而虐用之也或以為  
未踰年之君其稱世子者不君靈公故不成其子非  
也楚虔殺蔡般棄疾圍其國凡八月而見滅世子在  
窮迫危懼之中固未暇立乎其位安得以為未踰年



之君而稱子也假使立乎其位而般死於楚其喪未至不斂不葬世子亦不成乎為君矣然世子繼世有國之稱必以此稱蔡有者父母之仇不與共天下與民守國效死不降至於力屈就擒虐用其身而不顧則有之為世子之道得矣

集說

孔氏穎達曰父既死矣猶稱世子者君死而國被圍未暇以禮即位故國以世子告劉氏敵

曰公羊云其稱世子何不君靈公不成其子也子謂不成其子而稱世子義與文反難以說也又鄭忽亦稱世子豈復不成其子哉又曰用之築防此似兒戲非可信也  
蘇氏轍曰蔡侯死蔡世子既立矣其不稱蔡子而稱蔡世子何也蔡侯死於楚不獲歸於蔡不斂不葬其子雖立不成君也是以稱世子而已君沒既葬稱子未葬稱子其喪未至而稱世子固其宜也  
師氏協曰春秋書滅國多矣未有如此其暴者

聖人詳其始末而記之書誘書殺書圍書執書用蓋  
深惡其暴也家氏鉉翁曰般固有當討之罪父死  
子立宜也而嬰城固守國亡身死特存其世子之名  
錄其為宗社死也趙氏與權曰楚虔滅陳誘殺蔡  
君而圍蔡頓兵八月蔡城守不下則以世子有不肯  
為之服也城陷就執虔忿其淹楚師也執歸用之經  
詳其事窮楚惡也程氏端學曰蔡般弑君父以篡  
位人所得討幸不見殺於當時而假手於彊楚身殄  
國滅及其嗣子可為亂臣賊子之大鑒汪氏克寬  
曰申無宇稱用諸侯則世子有已嗣君位矣特以其  
父誘死於外其國被圍於內狼狽憂虞未能備為君  
之禮且書世子者又以著世嫡之正也季氏本曰  
圍蔡稱公子棄疾滅止稱師  
者一事再見從略之恒詞也

附錄左傳

十二月單成公卒楚子城陳蔡不羹使  
棄疾為蔡公王問於申無宇曰棄疾在蔡

何如對曰擇子莫如父擇臣莫如君鄭莊公城櫟而  
寘子元馬使昭公不立齊桓公城穀而寘管仲馬至  
於今賴之臣聞五大不在邊五細不在庭親不在外  
羈不在內今棄疾在外鄭丹在內君其少戒王曰國  
有大城何如對曰鄭京櫟實穀曼伯宋蕭亳實穀子  
游齊渠丘實穀無知衛蒲戚實出獻公若由是觀之  
則害於國末大必折  
尾大不掉君所知也

不羹杜注襄城縣東南有不羹城定陵西北有不  
羹亭今案不羹有二開封府襄城縣東南者西不  
羹也南陽府舞陽縣北者東  
不羹即定陵之不羹亭也

辛景王十  
未五年

十有二年

晉昭二年齊景十八年衛靈五年  
鄭簡三十六年曹武二十五年杞

平六年宋元二年秦哀七年  
楚靈十一年吳夷末十四年

春齊高偃帥師納北燕伯于陽

陽杜注陽即唐燕別邑  
中山有唐縣今直隸保

定府唐縣東有漢唐縣

故城春秋時曰陽也

左傳

十二年春齊高偃納北  
燕伯欵于唐因其衆也

集說

杜氏預曰三年燕伯出奔齊不言于燕未得國  
都劉氏敞曰其言納何言納者與納也諸侯

失國諸侯納之正也又曰公羊曰伯于陽者公子陽

生也非也公羊謂孔子作春秋用百二十國寶書也

豈百二十國書悉如此殘缺乎曷為不革又曰穀梁

曰納者內弗受也非也諸侯失國諸侯納之救患哀

禍也顧以為弗受反當遂其亂臣賊子之心乎又曰

燕伯之不名何也不以高偃挈燕伯也亦非也楚人

圍陳納頓子於頓穀梁以謂納頓子者陳也陳之挈

頓子可矣即何以不名頓子乎高氏閏曰三年北

燕伯出奔齊六年齊將納之而不果款播越在外蓋  
十年矣不能自優而藉齊之力僅能納之於別邑而  
已失國之難反如此張氏洽曰燕伯出奔名而納  
之不名其罪未至如衛朔鄭突呂氏大圭曰凡言  
納者內弗受而彊致之辭此蓋內無有為之助而自  
外用勢力以納之耳說者曰納者不宜納也此言過  
矣以北燕伯觀之書之曰北燕伯則是燕之君也與  
入于夷儀同豈有不宜納者耶家氏鉉翁曰燕伯  
入陽與衛獻入夷儀皆以亂臣迫逐而出因大國之  
力以入於其邑皆不名所以正君臣之分齊氏履  
謙曰燕在於春秋有二此獨言北燕者見其僻遠亦  
以別姑姓燕程氏端學曰燕伯不能治國至於出  
奔今倚大國之力十年始克入其邑其為君可知矣  
然諸侯出入廢置自如又以大夫而納諸侯王綱不  
振甚矣

# 三月壬申鄭伯嘉卒

左傳

三月鄭簡公卒將為墓除及游氏之廟將毀焉

子大叔使其除徒執用以立而無庸毀曰子產過女而問何故不毀乃曰不忍廟也諾將毀矣既如是子產乃使辟之司墓之室有當道者毀之則朝而壙弗毀則日中而壙子太叔請毀之曰無若諸侯之實何子產曰諸侯之實能來會吾喪豈憚日中無損於實而民不害何故不為遂弗毀日中而葬君子謂子產於是乎知禮禮無毀人以自成也

集說

高氏閔曰鄭去中國即楚久矣至於簡公乘晉悼之方興以國反正遂息諸侯之兵子產相之

薰然慈仁民蒙其惠

蔚為春秋之賢諸侯

# 夏宋公使華定來聘

左傳

夏宋華定來聘通嗣君也享之為賦蓼蕭弗知又不答賦昭子曰必亡宴語之不懷寵光之不

宣令德之不知同福之不受將何以在

集說

高氏閔曰公始以卿共平公之葬故宋元公嗣位而即使來聘也

附錄左傳

齊侯衛侯鄭伯如晉朝嗣君也

# 公如晉至河乃復

左傳

公如晉至河乃復取鄭之役莒人愬於晉晉有平公之喪未之治也故辭公公子慙遂如晉

集說

胡氏寧曰穀梁曰季孫氏不使遂乎晉也然公

有夫人齊歸之喪未及練祥而出行朝禮已不立矣雖微季孫氏其能遂乎家氏鉉翁曰魯受莒之叛臣叛邑敗其師伐其國又取其地然皆季氏之

所為明年晉人執意如亦知罪之所在而公每至晉輒為所卻豈晉之諸臣曲為季氏之地公有辭而不能以自

仲讎

附錄左傳

晉侯享諸侯子產相鄭伯辭於享請免喪而後聽命晉人許之禮也晉侯以齊侯宴

中行穆子相投壺晉侯先穆子曰有酒如淮有肉如坻寡君中此為諸侯師中之齊侯舉矢曰有酒如澠有肉如陵寡人中此與君代興亦中之伯瑕謂穆子曰子失辭吾固師諸侯矣壺何為焉其以中雋也齊君弱吾君歸弗來矣穆子曰吾軍帥彊禦卒乘競勸今猶古也齊將何事公孫佖趨進曰日旰君勤可以出矣以齊侯出

五月葬鄭簡公



左傳

六月葬鄭簡公

集說

杜氏預曰三月而葬速

楚殺其大夫成熊

熊公作然穀作虎

左傳

楚子謂成虎若敖之餘也遂殺之或譖成虎於楚子成虎知之而不能行書曰楚殺其大夫成

虎懷

寵也

集說

家氏鉉翁曰虔以猜忌信讒殺無罪之大夫故以累上之辭書之

附錄左傳

晉荀吳偽會齊師者假道於鮮虞遂入昔陽秋八月壬午滅肥以肥子緜皋歸周

原伯綏虐其興臣使曹逃冬十月壬申朔原興人逐綏而立公子䟽尋綏奔郊甘簡公無子立其弟過

過將去成景之族成景之族賂劉獻公丙申殺甘悼公而立成公之孫鮪丁酉殺獻太子之傅庚皮之子過殺瑕辛於市及宮嬖綽王孫沒劉州鳩陰忌老陽子

鮮虞杜注白狄別種在中山新市縣今直隸真定府新樂縣西南有新市故城俗名新城鋪其地有鮮虞亭史記索隱曰中山古鮮虞國姬姓也昔陽杜注樂平沾縣東有昔陽城今山西太原府平定州有昔陽城元和志謂之夕陽城也案樂平去新樂幾三百里參之道里疑太迥遠今藁城西南亦有昔陽亭水經注謂之鼓聚與新樂接壤且其地為肥國都劉炫所謂肥鼓竝在鉅鹿昔陽即是鼓都在鮮虞東南似較杜說為的肥杜注鉅鹿下曲陽縣有肥累城魏收志藁城有肥累即此城也今在藁城縣西南七里

秋七月

冬十月公子慙出奔齊

慙公作整

左傳

季平子立而不禮於南蒯南蒯謂子仲吾出季氏而歸其室於公子更其位我以費為公臣子

仲許之南蒯語叔仲穆子且告之故季悼子之卒也叔孫昭子以再命為卿及平子伐莒克之更受三命叔仲子欲構二家謂平子曰三命踰父兄非禮也平子曰然故使昭子昭子曰叔孫氏有家禍殺適立庶故媼也及此若因禍以斃之則聞命矣若不廢君命則固有著矣昭子朝而命吏曰媼將與季氏訟書辭無頗季孫懼而歸罪於叔仲子故叔仲小南蒯公子慙謀季氏慙告公而遂從公如晉南蒯懼不克以費叛如齊子仲還及衛聞亂逃介而先及郊聞費叛遂奔齊南蒯之將叛也其鄉人或知之過之而歎且言

曰恤恤乎湫乎攸乎深恩而淺謀遁身而遠志家臣而君圖有人矣哉南蒯枚筮之遇坤之比曰黃裳元吉以為大吉也示子服惠伯曰即欲有事何如惠伯曰吾嘗學此矣忠信之事則可不然必敗外疆內溫忠也和以率貞信也故曰黃裳元吉黃中之色也裳下之飾也元善之長也中不忠不得其色下不共不得其飾事不善不得其極外內倡和為忠率事以信為共供養三德為善非此三者弗當且夫易不可以占險將何事也且可飾乎中美能黃上美為元下美則裳參成可筮猶有闕也筮雖吉未也將適費飲鄉人酒鄉人或歌之曰我有圃生之杞乎從我者子乎去我者鄙乎倍其鄰者耻乎已乎已乎非吾黨之士乎平子欲使昭子逐叔仲小小聞之不敢朝昭子命吏謂小待政於朝曰吾不為怨府

集說

劉氏敞曰杜云書名謀亂故子謂愬本患季氏彊公室弱是以與公謀去季氏也此則季氏之

仇而魯忠臣矣謀泄事變卒為彊臣所逐豈謀亂者哉苟使慙無罪而奔遂書其字乎黨於季氏失君臣之義高氏閔曰季氏之臣南蒯將去季氏而立慙不克而以費叛慙遂奔齊是以君子譏其妄而哀其志也陳氏傅良曰奔辭有三公孫敖如京師不至而復丙戌奔莒未將命之辭也公孫歸父如晉還自晉至莒遂奔齊復命之辭也慙與南蒯謀季氏告公而遂從公如晉南蒯以費叛慙還及郊未復命聞亂遂奔齊季氏之出其君有以也則慙有奔焉耳

## 楚子伐徐

左傳楚子狩於州來次於潁尾使蕩侯潘子司馬督蹕尹午陵尹喜帥師圍徐以懼吳楚子次於乾谿以為之援雨雪王皮冠秦復陶翠被豹舄執鞭以出僕析父從右尹子革夕王見之去冠被舍鞭與之

語曰昔我先王熊繹與呂伋王孫牟變父禽父竝事  
康王四國皆有分我獨無有今吾使人於周求鼎以  
為分王其與我乎對曰與君王哉昔我先王熊繹辟  
在荆山篳路藍縷以處草莽跋涉山林以事天子唯  
是挑弧棘矢以共禦王事齊王舅也晉及魯衛王母  
弟也楚是以無分而彼皆有今周與四國服事君王  
將唯命是從豈其愛鼎王曰昔我皇祖伯父昆吾舊  
許是宅今鄭人貪賴其田而不我與我若求之其與  
我乎對曰與君王哉周不愛鼎鄭敢愛田王曰昔諸  
侯遠我而畏晉今我大城陳蔡不羹賦皆千乘子與  
有勞焉諸侯其畏我乎對曰畏君王哉是四國者專  
足畏也又加之以楚敢不畏君王哉王尹路請曰君  
王命剥圭以為鉞秘敢請命王入視之析父謂子革  
吾子楚國之望也今與王言如響國其若之何子革  
曰摩厲以須王出吾刃將斬矣王出復語左史倚相  
趨過王曰是良史也子善視之是能讀三墳五典八

索九丘對曰臣嘗問焉昔穆王欲肆其心周行天下將皆必有車轍馬跡焉祭公謀父作祈招之詩以止王心王是以獲沒於祗宮臣問其詩而不知也若問遠焉其焉能知之王曰子能乎對曰能其詩曰析招之愠愠式昭德音思我王度式如玉式如金形民之力而無醉飽之心王揖而入饋不食寢不寐數日不能自克以及於難仲尼曰古也有志克己復禮仁也信善哉楚靈王若能如是豈其辱於乾谿

潁尾杜注潁水之尾在下蔡西案潁尾潁水入淮處也漢志潁陽城山潁水所出東至下蔡入淮在今江南潁上縣與壽州接界謂之潁口水經注云潁水又東南逕鄭城東又東南入淮即春秋潁尾也

集說高氏閏曰徐吳之姻國也楚人疾吳故遷怒於徐既執其君又伐其國也李氏蘄曰僖十五

年書楚人伐徐敗徐之後徐世從楚至是再伐則以吳故也

# 晉伐鮮虞

左傳

因肥之役也

集說

杜氏預曰不書將帥史闕文 蕪氏轅曰晉獻公假道於虞以滅虢因以執虞公其滅虢也書

晉師其執虞公也書晉人今伐鮮虞稱人若師可也特書晉深罪之也楚滅陳蔡而晉不救力誠不能君子不罪也能伐鮮虞而不救陳蔡力非不足也棄諸侯也 齊氏履謙曰文十年秦伐晉成三年鄭伐許及此年晉伐鮮虞三者皆春秋闕文

壬景王十

十有三年

晉昭三年齊景十九年衛靈六年蔡平公廬元年鄭定公寧元年曹

武二十六年陳惠公吳元年紀平七年宋元三年秦哀八年楚靈十二年吳夷末十五年



# 春叔弓帥師圍費

左傳

十三年春叔弓圍費弗克敗馬平子怒令見費

者衣之饑者食之為之令主而共其乏困費來如歸南氏亡矣民將叛之誰與居邑若憚之以威懼之以怒民疾而叛為之聚也若諸侯皆然費人無歸不親南氏將馬入矣平子從之費人叛南氏

胡傳

費內邑也命正卿為主將舉大眾圍其城若敵國然者家臣彊大夫弱也語不云乎有一言可

以終身行之者其恕矣夫已所不欲勿施於人所惡於下者毋以事上也所惡於上者毋以使下也然後家齊而國治矣季孫意如以所惡於下者事其上而不忠於其君以所惡於上者使其下而不禮於其臣出乎爾反乎爾宜南蒯之及此也春秋之法不書內叛反求諸已而已矣其書圍費欲著其實不沒之也

集說

陸氏淳曰淳聞於師曰凡家臣以邑叛悉不書叛人之名何也曰家臣賤微名不合登於史冊

也但書大夫園之則邑叛可知矣且罪大夫無政而使家臣得專邑以叛也克之不書本非他國之邑也

高氏閌曰費季氏邑也叔弓帥師園之見家臣之彊季氏之無君也家臣以邑叛不以君命而使大夫討之如是則大夫非魯之大夫也季氏之大夫也師非魯之師也季氏之師也如是而欲討蒯不思之甚也

家氏鉉翁曰南蒯不書叛何也曰蒯號於人曰吾以尊公室其心跡未著烏得正其罪卒之以費奔齊於是為叛臣矣曰家臣尊公室可乎曰可諸侯之臣皆天子之臣也大夫之臣皆諸侯之臣也當時有謂家臣不當言彊公室者乃亂賊之黨之悖辭而傳者有取焉不敢謂然也

汪氏克寬曰經書帥師園內邑者五園棘者復汶陽田而棘不服也園費園鄆兩園邱者家臣彊而以邑叛也復本國之邑而書之

如攻他國之邑者譏不能修德以服其民也討本邑之叛而書之如復舊邑者譏其不能正己以馭其臣也故曰治人不治反其智其身正而天下歸之

夏四月楚公子比自晉歸于楚弑其君虔于乾谿

谿穀作溪

左傳

楚子之為令尹也殺大司馬遽掩而取其室及即位奪遽居田遷許而質許圍蔡洧有寵於王

王之滅蔡也其父死焉王使與於守而行申之會越大夫戮焉王奪鬬韋龜中犖又奪成然邑而使為郊尹蔓成然故事蔡公故遽氏之族及遽居許圍蔡洧蔓成然皆王所不禮也因羣喪職之族啟越大夫常壽過作亂圍固城克息舟城而居之觀起之死也其子從在蔡事朝吳曰今不封蔡蔡不封矣我請試之以蔡公之命召子干子皙及郊而告之情彊與之盟入襲蔡蔡公將食見之而逃觀從使子干食坎用牲

加書而速行已徇於蔡曰蔡公召二子將納之與之盟而遣之矣將師而從之蔡人聚將執之辭曰失賊成軍而殺余何益乃釋之朝吳曰二三子若能死亡則如違之以待所濟若求安定則如與之以濟所欲且違上何適而可衆曰與之乃奉蔡公召二子而盟於鄧依陳蔡人以國楚公子比公子黑肱公子棄疾蔓成然蔡朝吳帥陳蔡不羹許葉之師因四族之徒以入楚及郊陳蔡欲為名故請為武軍蔡公知之曰欲速且役病矣請藩而已乃藩為軍蔡公使須務牟與史婢先入因正僕人殺太子祿及公子罷敵公子比為王公子黑肱為令尹次於魚陂公子棄疾為司馬先除王宮使觀從從師于乾谿而遂告之且曰先歸復所後者剽師及訾梁而潰王聞羣公子之死也自投於車下曰人之愛其子也亦如余乎侍者曰甚焉小人老而無子知擠於溝壑矣王曰余殺人子多矣能無及此乎右尹子革曰請侍於郊以聽國人王

曰衆怒不可犯也曰若入於大都而乞師於諸侯王  
曰皆叛矣曰若亡於諸侯以聽大國之圖君也王曰  
大福不再祇取辱焉然丹乃歸於楚王沿夏將欲入  
鄢芋尹無宇之子申亥曰吾父再奸王命王弗誅惠  
孰大焉君不可忍惠不可棄吾其從王乃求王遇諸  
棘闡以歸夏五月癸亥王縊於芋尹申亥氏申亥以  
其二女殉而葬之

中犢杜注邑名 息舟杜注楚邑 魚陂杜注竟  
陵縣城西北有甘魚陂戰國策冷向曰楚北有符  
離之塞南有甘魚之口是也今在湖廣  
安陸府景陵縣西北 夏杜注漢別名

公羊 靈王為無道作乾谿之臺三年不成楚公子棄  
疾脅比而立之然後令於乾谿之役曰比已立  
矣後歸者不得復其田里  
衆罷而去之靈王經而死

胡傳

楚師伐徐楚子虔次于乾谿為之援公子棄疾

君陳蔡主方城之外有觀從者率羣失職以棄疾命召比於晉既至脅比而立之令于乾谿曰先至者復其田里師潰而歸楚子經而死或曰昭元年楚虔弑立比出奔晉十三年比歸而虔縊於棘闥則比未嘗一日北面事虔為之臣虔又弑立固非比之君矣而書曰比弑其君虔何也曰凡去國出奔而君不以為臣則晉於樂盈是也臣不以為君則公子鱄於衛是也若去國雖久而爵祿有列於朝出入有詔於國不掃其墳墓不收其田里不繫繫其宗族即君臣之分猶在也比雖奔晉而晉人以羈待比以國底祿固楚之亡公子也楚又未嘗錮之如晉之於樂盈比又未嘗不向楚而坐如子鮮之於衛安得以為比非楚臣而虔非比之君乎春秋書比弑其君虔明於君臣之義也或曰虔弑邾敖以立比之獲罪豈其無討賊之心而徒貪夫位歟曰春秋罪比不明乎君臣之

義不責其無討賊之心夫比雖當次及之序而棄疾亦居楚國之常以取國言之比具五難而棄疾有五利此事之變也為比者宜乎效死不立若國有所歸為曹子臧魯叔肸不亦善乎不然身居令尹都貴戚之卿為杜稷鎮亂不自已亦可也今乃脅於勢而忘其守怵於利而忘其義被之大惡欲辭而不可得矣為人臣而不知春秋守經事而不知其宜遭變事而不知其權者若此類是也悲夫聖人垂戒之意明矣

**集說** 陸氏淳曰淳聞於師曰不書復入而言歸者明非始謀也以之首惡罪其從亂且敢有其位也所謂原情定罪 孫氏復曰先言歸者明比不與謀也後言弑者正比之罪也 蕪氏輟曰比將為君不曰楚比而曰公子比何也比之歸非其謀也亂始於觀從而成於棄疾以比為名而已為君非比志也比雖不志於君迫於觀從棄疾而以身許之以致虔死則比雖不弑而弑君之名比尸之矣比之歸也虔猶

在楚其不曰入何也觀從召之蔡人與之楚人不拒則比之歸無難矣高氏閔曰先書比歸者明在外本無弑君之心也及其以棄疾之請遂有得位之心故復言弑者正比之首惡也既曰歸于楚又曰弑于乾谿者非比親弑之也加之罪耳比奔晉十三年矣其能一旦自外歸而弑其君乎然棄疾脅比而立虔自縊而死若比不從棄疾之脅則虔未必死棄疾不得比則無以濟其亂比見利而動遽欲為君則成虔之縊者比也比效死不立則可矣既立又焉得避是名哉若使人之受其名也已享其利則後世姦人苟有藉口以濟其私者莫不皆寘力焉故聖人正名比之弑君所以絕後世姦人之禍也家氏鉉翁曰始虔之篡有能仗大義而殺之求郊教之後而立之則殺者為義篡者為賊從討州吁無知之例可也及今而後殺之又代居其位不得謂之討賊矣比雖未嘗事虔然虔兄也比弟也虔君楚國比自外歸為君而



虔死不曰弑君可乎 汪氏克寬曰公羊云歸無惡  
於弑立夫弑逆大惡聖人不可以妄加於人豈以無惡  
而稱弑乎穀梁亦云言歸非弑也弑君者日不日比  
不弑也然里克商人陳乞之弑皆不日豈皆不弑乎  
穀梁於許買之弑則曰日弑正卒也正卒則正不弑  
也或日或不日皆曰不弑若何而名之哉今考之經  
齊連稱管至父弑諸兒而立無知為君則書曰無知  
弑君晉夷皋州蒲既弑而後公子黑臀公孫周歸於  
晉以為君則不書黑臀與周為弑君也春秋以弑虔  
之罪歸獄於比者蓋楚共之子長則康王次虔次比  
次黑肱次棄疾棄疾因虔無道而謀代其位以已次  
居幼不足以服國人故脅比而君之而虔之殞實在  
比立之後叔向謂比涉五難以弑舊君當時蓋亦以  
比為首惡矣隋煬無道其臣司馬德戡裴虔通等與  
宇文智及弑帝推智及之兄化及而立之雖化及聞  
謀變色流汗迎入朝堂戰慄不能言而邵子經世書

朱子綱目皆書化及弑君且不以煬帝為弑君父之賊而末減也其得春秋書楚比之義矣

案左氏以為田獵于乾谿公羊以為築乾谿之臺二說不同今無所考姑竝存之

# 楚公子棄疾殺公子比

殺公作弑

左傳

觀從謂子干曰不殺棄疾雖得國猶受禍也子干曰余不忍也子玉曰人將忍子吾不忍侯也

乃行國每夜駭曰王入矣乙卯夜棄疾使周走而呼曰王至矣國人大驚使蔓成然走告子干子皙曰王至矣國人殺君司馬將來矣君若早自圖也可以無辱衆怒如水火馬不可為謀又有呼而走至者曰衆至矣二子皆自殺丙辰棄疾即位名曰熊居葬子干於訾實訾殺囚衣之王服而流諸漢乃取而葬之以靖國人使子旗為令尹楚師還自徐吳人敗諸豫章獲其五帥平王封陳蔡復遷邑致羣賂施舍寬民

有罪舉職召觀從王曰唯爾所欲對曰臣之先佐開  
卜乃使爲卜尹使枝如子躬聘於鄭且致犖犖之田  
事畢弗致鄭人請曰聞諸道路將命寡君以犖犖敢  
請命對曰臣未聞命既復王問犖犖降服而對曰臣  
過失命未之致也王執其手曰子毋勤姑歸不穀有  
事其告子也他年茅尹申亥以王柩告乃改葬之初  
靈王卜曰余尚得天下不吉投龜詬天而呼曰是區  
區者而不余畀余必自取之民患王之無厭也故從  
亂如歸初共王無冢適有寵子五人無適立焉乃大  
有事於羣望而祈曰請神擇於五人者使主社稷乃  
徧以璧見於羣望曰當璧而拜者神所立也誰敢違  
之既乃與巴姬密埋璧於太室之庭使五人齊而長  
入拜康王跨之靈王肘加焉子干子皙皆達之平王  
弱抱而入再拜皆厭紐闕韋龜屬成然焉且曰棄禮  
違命楚其危哉子干歸韓宣子問於叔向曰子干其  
濟乎對曰難宣子曰同惡相求如市賈馬何難對曰

無與同好誰與同惡取國有五難有寵而無人一也  
有人而無主二也有主而無謀三也有謀而無民四  
也有民而無德五也子干在晉十三年矣晉楚之從  
不聞達者可謂無人族盡親叛可謂無主無釁而動  
可謂無謀為羈終世可謂無民亡無愛徵可謂無德  
王虐而不忘楚君子干涉五難以弑舊君誰能濟之  
有楚國者其棄疾乎君陳蔡城外屬焉苛慝不作盜  
賊伏隱私欲不違民無怨心先神命之國民信之芊  
姓有亂必季實立楚之常也獲神一也有民二也令  
德三也寵貴四也居常五也有五利以去五難誰能  
害之子干之官則右尹也數其貴寵則庶子也以神  
所命則又達之其貴亡矣其寵棄矣民無懷焉國無  
與焉將何以立宣子曰齊桓晉文不亦是乎對曰齊  
桓衛姬之子也有寵於僖有鮑叔牙賓須無隰朋以  
為輔佐有莒衛以為外主有國高以為內主從善如  
流下善齊肅不藏賄不從欲施舍不倦求善不厭是

以有國不亦宜乎我先君文公狐季姬之子也有寵  
於獻好學而不貳生十七年有士五人有先大夫子  
餘子犯以為腹心有魏犢賈佗以為股肱有齊宋秦  
楚以為外主有欒郤狐先以為內主亡十九年守志  
彌篤惠懷棄民民從而與之獻無異親民無異望天  
方相晉將何以代文此二君者異於子干共有寵子  
國有與主無施於民無援於外去  
晉而不送歸楚而不逆何以冀國

公羊

比已立矣其稱公子何其意不當也其意不當  
曷為加弑焉爾比之義宜乎效死不立大夫相

殺稱人此其稱名氏以  
弑何言將自是為君也

胡傳

棄疾立比為王而已為司馬固君比矣而又殺  
之則宜書曰棄疾弑其君比而曰殺公子比何

也初子干歸自晉觀從假棄疾命而召之來則來坎  
牲加書而彊之盟則盟帥四族衆而使之入楚則入

殺太子祿而立之為王則王周走而呼於國中謂衆怒如水火而逼之自殺則自殺其行止遲速去就死生皆觀從與國人所為而比未嘗可否之也安得為棄疾之君乎然比兄也黑肱弟也棄疾其季弟也立比為王肱為令尹疾為司馬蓋國人以長幼之序立之也則宜書曰楚人殺比而春秋變文歸獄棄疾者誅其本意在於代比而非討之也所謂輕重之權衡曲直之繩墨而懷惡者亦無所隱其情矣

集說

杜氏預曰比雖為君而未列於諸侯故不稱爵殺不稱人罪棄疾

無知皆書曰人討比不稱人何也棄疾以圖位而殺比其罪鉤也故不可稱人蘓氏轍曰比弑其君殺之不稱楚人而曰公子棄疾殺公子比何也棄疾非討其弑而代之也比既為君不曰楚公子棄疾弑其君比何也衆雖以比為君而比不當君也高氏閏曰比復稱公子不以討賊之辭加之者非討賊也殺

而代之也。憫比墮棄疾之謀，以深罪棄疾也。棄疾本圖位而脅立比，比既立遂殺而篡之，改名曰居。蓋弑君之人，名在諸侯之策，故公子圍改名虔，公子棄疾改名居。張氏洽曰：公子比已為王棄疾為司馬，則君臣若已定矣。及棄疾殺比，乃不以弑君書者，君臣之分未定而棄疾譎殺之也。比貪為君之利，不能效死，不立不得，不服首惡之罪。若夫分未正而以譎殺之於曖昧之中，目之以兩下相殺可矣。未可稱弑君也。李氏廉曰：比若實弑君，則不當仍書公子棄疾。若真討賊，則不當不書人。楚國若實君比，則不當不書其君書公子。則比異於州吁，無知不書人。則棄疾異於石碯、雍廩，不書其君，則楚人視比異於商人蔡般。此春秋之變文也。汪氏克寬曰：比未能君楚，故不為棄疾之君也。又曰：公羊作弑公子比，夫弑者下殺上之辭，故雖里克弑君之子，猶書曰殺安有書公子某弑公子某之文哉。

案公穀二家皆以比為不弑其意相同然公羊以不能效死責比得春秋書弑之旨穀梁既曰比非弑又曰比不嫌略無責比之意豈比遂得無罪乎故刪之

秋公會劉子晉侯齊侯宋公衛侯鄭伯曹伯莒子邾子

滕子薛伯杞伯小邾子于平丘

平丘杜注陳留長垣縣西南漢置平丘縣晉廢

今故城在河南開封府陳留縣北九十里

左傳

晉成虎祁諸侯朝而歸者皆有貳心為取鄭故晉將以諸侯來討叔向曰諸侯不可以不示威

乃竝徵會告於吳秋晉侯會吳子於良水道不可吳子辭乃還七月丙寅治兵於邾南甲車四千乘羊舌鮒攝司馬遂合諸侯于平丘子產子太叔相鄭伯以會子產以幄幕九張行子太叔以四十既而悔之每



舍損焉及會亦如之次於衛地叔鮒求貨於衛淫芻  
蕘者衛人使屠伯饋叔向羹與一簋錦曰諸侯事晉  
未敢攜貳况衛在君之宇下而敢有異志芻蕘者異  
於他日敢請之叔向受羹反錦曰晉有羊舌鮒者瀆  
貨無厭亦將及矣為此役也子若以  
君命賜之其已客從之未退而禁之

胡傳

方是時楚人暴橫陵蔑諸侯在宋之盟爭晉先  
敵及號之會仍讀舊書遂召諸侯為申之舉遷

賴於駟縣陳滅蔡此乃敵國外患臨深履薄恐懼省  
戒之時其君當倚於法家拂士以德修國政其臣當  
急於責難陳善以禮格君心內結外攘復悼公之業  
若弗暇也今乃施施然安於不競無憤耻自彊之志  
惟宮室臺榭是崇是飾及諸侯皆貳顧欲示威徵會  
而以兵甲耀之不亦末乎春秋之法制治於未亂保  
邦於未危貴事之豫耻以苟成而不要諸道者也是  
以深惡此會如下文所貶云明其義者然後知仲尼

作經於一臺園之築一宮室門觀之作必謹而書以重民力其弭亂持危固結人心之慮遠矣

集說

陳氏傅良曰晉之不自彊於主盟自重丘而後皆大夫爾於是復合諸侯叔向請之劉子臨之

諸夏猶有屬焉而齊人不可鄭人爭承魯不預盟列國之君大夫旅見於楚晉之合諸侯由是止鄆陵之後參盟復作晉非盟主矣張氏洽曰晉平主盟內惑於寵嬖以女色蠱其心外崇建宮室以侈麗誇諸侯故楚虔盡召諸侯而肆為宗主吞滅親姻坐視不救及平公卒昭公立而楚虔斃乃幸楚亂欲立威以服諸侯而不知大勢已去徒治親暱本末倒置內外離心諸侯益貳此平丘之會所以益隳霸業也汪氏克寬曰晉主夏盟不競於楚久矣以諸侯皆貳而會平丘然不能修德以感人心而徒示甲兵之威不能辨分以服人心而乃盟天子之老是以雖大合十三國之君而臨之以劉獻公文悼之會盟未有如斯

之盛而卒失霸業者無其本而專事其末故也晉昭  
在位僅六年始會八國之大夫而不能救蔡總會十  
三國之諸侯而不能振霸業其亦不足稱矣王氏  
錫爵曰子產練習國體故每事斟酌適宜過於太叔  
而太叔亦有從善之度

## 八月甲戌同盟于平丘

左傳

晉人將尋盟齊人不可晉侯使叔向告劉獻公  
曰抑齊人不盟若之何對曰盟以底信君苟有

信諸侯不貳何患焉告之以文辭董之以武師雖齊  
不許君庸多矣天子之老請帥王賦元戎十乘以先  
啟行遲速唯君叔向告於齊曰諸侯求盟已在此矣  
今君弗利寡君以為請對曰諸侯討貳則有尋盟若  
皆用命何盟之尋叔向曰國家之敗有事而無業事  
則不經有業而無禮經則不序有禮而無威序則不

共有威而不昭共則不明不明棄共百事不終所由  
傾覆也是故明王之制使諸侯歲聘以志業間朝以  
講禮再朝而會以示威再會而盟以顯昭明志業於  
好講禮於等示威於衆昭明於神自古以來未之或  
失也存亡之道恒由是興晉禮主盟懼有不治奉承  
齊犧而布諸君求終事也君曰余必廢之何齊之有  
唯君圖之寡君聞命矣齊人懼對曰小國言之大國  
制之敢不聽從既聞命矣敬共以往遲速唯君叔向  
曰諸侯有間矣不可以不示衆八月辛未治兵建而  
不旆壬申復旆之諸侯畏之邾人莒人愬於晉曰魯  
朝夕伐我幾亡矣我之不共魯故之以晉侯不見公  
使叔向來辭曰諸侯將以甲戌盟寡君知不得事君  
矣請君無勤子服惠伯對曰君信蠻夷之訴以絕兄  
弟之國棄周公之後亦唯君寡君聞命矣叔向曰寡  
君有甲車四千乘在雖以無道行之必可畏也況其  
率道其何敵之有牛雖瘠僨於豚上其畏不死南蒯

子仲之憂其庸可棄乎若奉晉之衆用諸侯之師因邾莒杞鄆之怒以討魯罪問其二憂何求而弗克魯人懼聽命甲戌同盟于平丘齊服也令諸侯日中造於除癸酉退朝子產命外僕速張於除子大叔止之使待明日及夕子產聞其未張也使速往乃無所張矣及盟子產爭承曰昔天子班貢輕重以列列尊貢重周之制也卑而貢重者甸服也鄭伯男也而使從公侯之貢懼弗給也敢以為請諸侯靖兵好以為事行理之命無月不至貢之無藝小國有闕所以得罪也諸侯修盟存小國也貢獻無極亡可待也存亡之制將在今矣自日中以爭至於昏晉人許之既盟子太叔咎之曰諸侯若討其可潰乎子產曰晉政多門貳偷之不暇何暇討國不競亦陵何國之為

胡傳書同盟者劉子與盟同懼楚也會與盟同地再書平丘者書之重詞之複其中必有美惡焉見

行事之深切著明故詞繁而不殺也是盟蓋或善之  
而以為惡何哉盟雖衰世之事然有定人道之大倫  
者矣有備天子之明禁者矣有束牲不歃相命而信  
自喻者矣有納斥候禁侵掠誠格而不復叛者矣其  
次猶以載書詞命相爭約於大神而不敢越者則未  
聞主盟列國奉承齊犧而矜其威力恐迫諸侯又信  
蠻夷之訴絕兄弟之歡求逞私憤間其憂疑如此盟  
者流及戰國疆衆相誇恫疑恐喝恣行陵暴死者十  
九積習所致有自來矣春秋禮義之大宗也曾是以  
為善乎詞繁而不殺則惡其競力不道為後世鑒也

集說 程子曰楚棄疾立諸侯懼之故同盟 家氏鉉  
翁曰自晉楚為成晉之君臣自謂天下無事喻  
情苟安無復自疆之志楚由是竊霸權虎視列國晉  
君臣鼠伏而不敢出幾二十年今楚虔罪盈惡稔自  
底覆亡晉昭乃復為會於平丘號召諸夏如病癰沉  
痼之人疆自支拄人之見之者知其無能有為是會

也齊不肯受盟晉人治兵邾南大陳戎馬脅而與之  
盟晉亦可鄙甚矣書同盟譏王臣不當下同列國之  
盟且譏晉人不當以兵脅諸侯而與之同盟是所謂  
一書再譏也李氏廉曰晉自重丘之後會盟皆大  
夫至此而再合諸侯蓋晉昭即位乘楚之亂又將有  
可為之機矣惜乎叔向以晉之賢大夫不能以義匡  
其君而乃導之以威力是以諸侯不服而晉之合諸  
侯遂止於此穀梁以為善其因楚有難而反陳蔡之  
君公羊注又以為諸侯欲討棄疾是皆不得其傳而  
臆度之言也汪氏克寬曰劉氏意林謂平丘興滅  
繼絕推其美殆與葵丘明王禁無以異故皆會盟同  
地而再言之今考陳蔡之復國實由於楚而晉昭未  
嘗有懿德美行超絕卓異非常之迹也謂春秋美平  
丘過矣陳氏宗之曰晉自重丘之後會盟皆大夫  
至此而再合諸侯晉昭初立有志於收諸侯也而叔  
向諸臣德卑材下故卒於無成自是亦不復合諸侯

# 公不與盟

與音預

胡傳

臣子之於君父隱諱其耻禮也十二國會于平丘公獨見辭不得與盟斯亦可耻矣曷為直書

其事而不隱也晉主此盟德則不競而矜兵甲之威肆脅持之術以諸侯上要天子之老而歃血以列國同憚荆蠻篡立之主而結盟無禮義忠信誠懇之心而以威詐泄之具此五不韙者得不與焉幸也聖人筆削春秋凡魯君可耻者必為之隱諱至會于沙隨而公不得見盟于平丘而公不得與自衆人常情必深沮喪以為辱矣仲尼推明其故自反而縮雖晉國之嚴夫何嫌乎哉直書其事示後世其義夫何嫌乎哉直書其事示後世立身行己之道也其垂訓之用大矣

集說

杜氏預曰魯不堪晉求讒慝弘多公不與盟非國惡故不諱孔氏穎達曰宣七年會于黑壤



傳曰晉侯之立也公不朝焉又不使大夫聘晉人止  
公子會盟于黃父公不與盟以賂免故黑壤之盟不  
書諱之也彼公不與盟諱而不書此書之者彼不相  
朝聘公實有罪諱國之惡故不書其盟此年邾人莒  
人無故怨愬晉人信之所謂讒慝弘多是言晉受讒  
言公無罪非國惡故不諱也劉氏敞曰公羊曰不  
耻不與是也言諸侯遂亂反陳蔡非也陳蔡滅而復  
封此豈非所謂力能救之則救之可也者乎何故耻  
之又曰穀梁曰可以與而不與譏在公也非也公於  
晉唯令之從豈其獨能違衆不盟乎程子曰晉罪  
公不使與盟雖欲辱公然得不與同盟之罪實為幸  
也胡氏寧曰叔向之言北宮黝也魯人之言曾子  
守約者也魯人能言而不能信故恐而不敢與盟聖  
人信其義以訓後世故直書其事而不以為諱也  
汪氏克寬曰或謂春秋揭公於不與盟之上則是不  
與盟之意主於魯非也沙隨之不見公不可言公不

見而平丘之不與盟不可言諸侯不盟公此屬辭之體也苟曰魯昭不肯與盟則其會諸侯于平丘果何乎為

### 晉人執季孫意如以歸

左傳

公不與盟晉人執季孫意如以幕蒙之使狄人守之司鐸射懷錦奉壺飲冰以蒲伏焉守者御

之乃與之錦而入晉人

以平子歸子服湫從

胡傳

稱人以執非伯討也自文以來公室微弱三家專魯而季氏罪之首也宿及意如尤為彊逼元

年代莒疆鄆十年伐莒取郕中分魯國以自封殖而使其君民食於家其不臣甚矣何以為非伯討乎晉人若按邾莒所訴有無之狀究南蒯子仲奔叛之因告於諸侯以其罪執之請於天子以大義廢之選於

魯卿更意如之位收歛私邑為公室之民使政令在君三家臣順則方伯之職修矣今魯與邾通好亦不朝夕伐莒而鄆鄭之故又非昭公意也徒以邾莒之言曰我之不共魯故之以遂辭魯君而執意如則是意在貨財而不責其無君臣之義也何得為伯討乎稱人以執罪晉之偷也

集說 汪氏克寬曰沙隨不見公則執行父平丘公不得與盟則執意如晉人固知季氏之專魯政矣惜乎汨於私欲但知以霸令威魯而不能以霸政治季氏是以徒能辱魯君而季孫得逞其討由晉之諸卿專權而荒疆家故也

附錄左傳 子產歸未至聞子皮卒哭且曰吾已無為為善矣唯夫子知我仲尼謂子產於是行也足以為國基矣詩曰樂只君子邦家之基子產君子之求樂者也且曰合諸侯藝貢事禮也

# 公至自會

集說

吳氏澂曰公雖不與同盟然已與平丘之會矣故以會致李氏蘄曰公羊以為諸侯遂亂反

陳蔡君子不耻不與焉注云時諸侯將征棄疾棄疾封陳蔡以說諸侯諸侯不復討楚楚亂遂成故公直不與也其說無據故不取

附錄左傳

鮮虞人聞晉師之悉起也而不警邊且不修備晉荀吳自著雍以上軍侵鮮虞及中

人驅衝競

大獲而歸

中人杜注中山望都縣西北有中人城案兩漢志皆云中山唐縣有中人亭蓋唐縣本自望都分置也今屬直隸保定府

蔡侯廬歸于蔡陳侯吳歸于陳

左傳

楚之滅蔡也靈王遷許胡沈道房申於荆馬平王即位既封陳蔡而皆復之禮也隱太子之子

廬歸于蔡禮也悼太子之子吳歸于陳禮也

房杜注汝南有吳房縣即房國今河南汝寧府遂平縣西有吳房城漢書地理志汝南郡吳房孟康曰本房子國楚靈王遷房於楚吳王闔閭弟夫槩奔楚楚封於此為堂谿氏以封吳故曰吳房案漢晉志皆作吳房杜注作吳防必傳寫誤也

胡傳

楚虔遷六小國於荆山又滅陳蔡而縣之及棄疾即位復諸遷國封蔡及陳隱太子有之子廬

歸于蔡悼太子偃師之子吳歸于陳曰歸者順詞也陳蔡昔皆滅矣不稱復歸者不與楚虔之得滅也其

稱歸于者國其所宜歸也廬與吳皆亡世子之子也而棄疾封之可謂有奉矣不言自楚者不與楚子之得封也其稱侯者

位其所固有也

集說

陸氏淳曰公羊曰不與諸侯專封趙子曰此本

與楚滅也今方記興復何關滅事責其滅時乎劉

氏絢曰陳蔡者先王之封國非楚可滅非楚可復也

故書爵書歸言二君之嗣位其所固有國其所宜歸

也二君名者素非諸侯至此始立也高氏閌曰楚

靈不道暴滅陳蔡而平王始依陳蔡之國藉以發難

今既得位遂復陳蔡以報其功暴靈之惡而歸恩於

已春秋不言歸自楚者見二國之復乃自當復非楚

得滅而復之也家氏鉉翁曰公羊曰其言歸何不

與諸侯專封也國固成周之建國何專封之有哉不

言復而言歸國固其國故爵以歸之吳氏澂曰楚

虔滅陳蔡而并其土地廬蔡靈之孫吳陳哀之孫當  
有其國而為君者也故其復國也書國書爵書名如  
失國之君歸其國然突赤歸而篡國者也不當有國  
故不繫國黃氏澤曰二君歸國是已入國來告之  
詞則楚之復二君在盟以前矣若以二君歸為晉盟  
之功則其歸當在九月十月今盟後使書歸未聞盟  
之功如此神速也汪氏克寬曰楚虔滅陳蔡而棄  
疾復其國春秋止書蔡平陳惠之歸其國而不言自  
楚歸若二國之  
自能興復焉爾

# 冬十月葬蔡靈公

左傳

冬十月葬蔡靈公禮也

集說

陸氏淳曰國復乃葬凡三十有一月劉氏敞  
曰穀梁云不與楚滅且成諸侯之事非也楚本

不當滅蔡則蔡雖滅非滅也不為諸侯而成之也  
俞氏皋曰蔡滅而靈公未葬故今國復然後葬也

### 公如晉至河乃復

左傳

公如晉荀吳謂韓宣子曰諸侯相朝講舊好也執其卿而朝其君有不好焉不如辭之乃使士

景伯辭

公於河

集說

汪氏克寬曰公之如晉蓋以請季孫也既不得與平丘之同盟而猶欲託躬朝之禮以請其臣

其失進退之義亦甚矣宜其見辭於晉而不得入也

### 吳滅州來

左傳

吳滅州來令尹子旗請伐吳王弗許曰吾未撫民人未事鬼神未修守備未定國家而用民力



敗不可悔州來在吳猶在楚也子姑待之

集說

王氏葆曰州來本近楚小國楚嘗取以為附庸及茲楚亂吳遂出其不意而滅之不書帥師不

書侵伐以見其滅之之易也家氏鉉翁曰州來吳楚中間要害處成七年吳入當撫而有之又五十載復以兵入而殘毀之十九年傳楚人城州來見吳不能有

附錄左傳

季孫猶在晉子服惠伯私於中行穆子曰魯事晉何以不如夷之小國魯兄弟也土

地猶大所命能具若為夷棄之使事齊楚其何瘳於晉親親與大賞共罰否所以為盟主也子其圖之諺曰臣一主二吾豈無大國穆子告韓宣子且曰楚滅陳蔡不能救而為夷執親將焉用之乃歸季孫惠伯曰寡君未知其罪合諸侯而執其老若猶有罪死命可也若曰無罪而惠免之諸侯不聞是逃命也何免

之為請從君惠於會宣子惠之謂叔向曰子能歸季  
孫乎對曰不能鮒也能乃使叔魚叔魚見季孫曰昔  
鮒也得罪於晉君自歸於魯君微武子之賜不至於  
今雖獲歸骨於晉猶子則肉之敢不盡情歸子而不  
歸鮒也聞諸吏將為子除館於西河其  
若之何且泣平子懼先歸惠伯待禮

欽定春秋傳說彙纂卷三十